

石城縣志卷八

藝文志

序記傳書雜著詩

經天緯地之為文禮樂射御書數之為藝合而言之談
何容易乃連篇累牘悉是風雲積篋盈箱無非月露雖
工無益登載何為庶子之春華固不如家丞秋實也舊
志必山川之名勝經制之流傳人物之懿美非斯三者
不錄得之矣茲於舊者悉仍之新者或間有所增必實
關一邑卓然可傳者循舊例也作藝文志

涇縣朱一棟纂輯



送教諭李公赴石城任序

原載通志

吳澄

昔宜黃李君夔友以太學名士釋褐為贛州牧不及祿而其子仲謀中教官選再任得石城教石城贛州屬邑也予少時客宜黃親見贛州之所以教其子者又見仲謀之所以學於家者往往異於常人蓋自宋末舉世浸淫於利誘士學大壞童年至皓首一惟罷軟爛熟之程文是誦是翼無復知為學之當本於經亦無復知為士之當謹於行贛州之教子則不然仲謀九歲以前論語諸經皆能成誦年雖幼德器如老成人不待父師繩束循循於禮法之內逮其父時已如此父既歿而孝養其母謹飭其身益勵於學

以能有所立今之往石城也諗於予曰新制取士以經明
行修為首好尚近古謂宜一變可以至道而學校承襲舊
弊不知所以自新之方凜凜然以經未明行未修為憂嗚
呼今之任教事者靡不哆然若有餘而仲謀獨歎若不足
此其賢於人也遠矣哉予之少也嘗有志於古人荒落久
矣何能有所裨益於今之時後乎雖然不敢不誦所聞古
聖遺經先儒俱有成說立異不可拘同亦不可虛心以玩
其辭反身以驗其實博覽而歸諸約旁通而貫於一一且
豁然有悟則所得者非止古人之糟粕也人之一身內有
父母兄弟夫婦外有宗族姻親朋友近而鄉黨遠而四方

推吾愛親敬長之良能以達乎彼何莫非吾之所當厚善
者寧厚毋薄寧過毋不及夫如是經豈有不明行豈有不
修者哉而非有甚高難行之事也人病不為耳今之往石
城也試以斯言與一邑之士詳究而實踐之殆必有契於
疇昔家庭之所聞也其母厭予言之卑延祐丙辰九月之
望

琴江造士錄序

熊懋官 邑人

昔蔡洪赴洛洛中以吳楚士少之洪云夜光之珠不必產於孟津之河盈握之璧不必採於崑崙之山英賢所出何必常處當時偉其說我石城舊不乏士緣科第間出耳食者遂么麼視之試士輒不入首選即入選亦不梓其文以傳所謂無因而至前類按劍而盼珠玉有以也彼不知承平日久雖三家之市列千金之貝於肆屬今文教覃敷薄海同軌即荒遠之墟亦侈譚左國而評遷固况石城固晉公桑梓之鄉文貞型鑄之地總角豈子舞袂哦經樵叟田夫且弛擔說稗况蠻中弟子負素弄穎而摘詞翰胡不能

文弟俗多不察自好之士操管而語務成一家言不盜人
含珠不剝人刺唾抱璞無媒世鮮知者今邑侯龍門尹先
生北海名村也銳意造士日羅諸子於齋舍講貫而劇切
之以軒輊其藝業復閱其文之優者銳諸梓嘗謂澤雉非
瑞腹錦稱奇并蛙乃微夏鳴如吹况士有一得可令之無
傳耶錄成余乃進多士賀之曰良驥伏櫪尾湛弗售孫陽
一顧買者輸十倍以償茲文一出即未許犄角文雄並駕
伊吾之北惟海內倘有知者當不以揭竿守鮒後我士而
直伯仲之人文尚有興哉噫元水之北有遺珠焉軒轅嘗
索之矣余於茲刻亦云

賀邑侯唐公臬憲檄獎序

熊懋官 邑人

昔禹疆理九州詳土之黑白墳暨山川之便利以貢厥後
井田殊而性習日隔荆揚之化不施之雍豫長民所務白
也故周封康叔於殷墟啟以商政疆以周索封唐叔於夏
墟啟以夏政疆以戎索茲二叔之治與周魯同夫治貴因
任自古記之藉令違人情蓋方俗以語治即卓異非循吏
矣我石城之土幽秀含雲清流漾翠風氣遠而孕之為人
亦多渾樸未琢有質直而無流心古稱可臥治我石當之
胡宰是邑者徃徃開拔奇之津而不沿於俗其妾穿垣墉
植蓬蒿者無論也聞一二任才吏類多簡髮而櫛數米而

石城縣志
卷八
炊等淳樸於澆器而刻核太至徒鑿混沌之竅恐傷敗之
彼攘臂誇張暇與之談理道哉惟我侯卓翁唐老先生粵
西偉君子也貌粹而氣溫度潤而才歛自視篆及今言必
詢俗動必因民淡泊寧靜懸刑減緩不乘人而鬪其提經
畫甫半載民稱大便負者償爭者讓跳梁不檢者率安以
肅若王子子期之馬不用鞭策而自調也若魚媚詹河之
餌如沉埃聚沫勿之疑也若飛走柔馴於梁鴛而飲啄於
其庭不駭且搏也蓋本清苦長厚之衷而出之以因任故
慮經而民便環封以內行嗣畏壘穰而祝庚桑又胡不安
而利之豈史春暉秦老先生按歷西江廉而異焉樊檄馳

至厥考上上不知者顧疑而問曰聞虞廷九載考績魯亦
三年報政故聖賢類得民難也唐侯席尚未暖治何容易
而秦君軌最之予荅曰茲乃所以見我侯夫伯禽變俗革
禮積三載而公不稱善尚父第簡禮從俗繫不五月而齊
報治矣侯之簡易倘亦有姬姜之意歟彼語枯槁於漢陰
之圃則見以為機談且果於狎鷗之岸則見以為詭操萬
金人三家之市則觀者且愴慌而逸此可以策我侯之政
矣是舉也閩吏著邑幕陳君績索余言以賀予曰庇宇下
分不容辭且喜桑梓得循吏而公道在監司也於是乎書

贈學博陳公陞淮府教授序

熊懋官 邑人

予博極羣書粵稽往牒載古今人才至用舍乖方真才幽
滯未嘗不掩卷拊髀代昔人增一慨也彼賈董之才為漢
儒冠讀治安天人諸策皆喙喙爭鳴可刊金石倘竟其設
施則漢之為漢未可量也顧一以長沙行一以江都行二
賢卒老於藩邸而漢治卑卑迄哀平靈獻之世無振焉可
鏡已我國家師古建官首重閣部次重省臬郡邑至藩府
犀工率以左遷者處之如宋提點官觀等例亦罕絡英賢
一第舍也今石庠訓陳崑山君胡躬蹈之君貌肅氣溫一
見決其為君子及稔厥行誼則解經不窮戴侍中法也學

行可師賀德基風也章程有度課試有方又胡安定之遺也跡其雅飭處類諸生著龜後來棉蕞藉令廉師表者無為耳目贅則此君必太學選少則一邑長無多矣無何以教授饒邱之檄聞余乃喟然嘆曰世態常落落不偶若燕石待沽荆璞不賞類如此悼惜者久之隨往慰之曰予聞官擇人未聞人擇官士君子能隨處立功名即一抱闕擊柝吏類可自浮厲以當任使况進此者乎漢昌邑不馴時左右競狼承以偶其好惟龔遂正諫不阿為王所敬悼卒免廷臣議隨見柄用此前事之師也君行有教導之責為祿貴乎自策而已如欲聞其術則蘧伯玉有云形莫若就

心莫若和就不欲人和不欲出昔顏闔得此以程其能竟以宮師著稱於衛亦法之可沿者君不欲之乎且予聞庶人贈人以財君子贈人以言予假於君子贈君以言君詎聽之否語云工修其業官宿其方行矣勉之先生起拜手謝曰敢不謹哉良規以箴朝夕遂書之以俾其行

署篆邑侯李公德政詩序

賴 彛 邑人

琴之民罹兵燹因蓄膏奔走而號呼非一日矣旦夕禱祠
 思得父母我者而噢咻之望賢牧如慈父母焉夫風詩載
 十五國備矣其中美刺不一而始於甘棠美召伯也終於
 九罭美周公也始則思慕之思慕之不足則嗟歎之嗟嘆
 之不足則歌詠之其來也莫不舉手加額致交相慶幸之
 詞其去也莫不歔歔扼腕不知涕泗之何從慈父母之入
 人深也如此非甚盛德孰能致之邑侯李公甲寅之來攝
 邑篆也招徠子遺十不一二荆棘荼穢瓦礫蕭條陰霾晝
 起青燐夜泣公撫然曰嘻瘡痍何日而有起色乎乃越數

石城縣志 卷六
月逆寇復蜂擁而來也公當此際處得其道制得其宜投
以艱鉅日久勞瘁而不辭試以煩劇飲食未遑而不倦為
分粒給糜以賑民饑為築堤堰濠以濟民渴為捐貲置械
以資軍實為身先士卒鼓勵鄉勇以壯敵愾為設奇制勝
賊退之後崇學校隆祀典紓徵徭平讞獄利者興害者除
即纓纓萬言難罄公之績也懸知其練軍實也書在司馬
急徵輸也紀在司農奏爰書也載在司寇興水利也策在
司空篆宰上之天子褒之勅勳銘於旂常雖然未必其書
之紀之載之策之褒之銘之者之慊人願否也而士之子

咏於庠農之子咏於野商賈之子咏於塗載歌載舞十萬
人如出一口度公之意固不以三公為榮萬鍾為富而以
口碑之在百姓者千秋不朽也合邑慶公三年之政成而
又惜公之歸郡速也公行矣工乎詩者歌以繫之以擬十
五國風之末殆始於甘棠終於九芘云

溫桂軒朝選制藝序

鴻臚李宜青
少卿

向余與同年魯存同官部曹每酒闌燈地劇論時下士魯存數巫稱其從姪桂軒為人家貧而孝養篤學而力行其有所得發之為文卓然可傳於後戊午舉於鄉公車詣京師魯存介之見余執其文一帙以質披覽之餘始信魯存之言非諛也顧數試於禮部卒不一遇汶汶於臯比者遂數十年甲戌落第別余南旋有倦容余贈一律云春鶯無語杏花殘卮酒蕭條午夢寒煙暝夕陽荒驛遠月低高樹曉峯攢囊琴價重何須碎荆璧珍藏仔細看眾裏莫嫌身是我漱鹽歸去舊詩壇慰之蓋勉之也歲辛卯宰邑粵東

東會同未幾以病謝去時余亦乞休里居桂軒集其所作
制藝遣使持詣余請訂余喜桂軒文素矣今其所集尤卓
卓犖犖理精而法密議論純粹一如其人韓子云言為心
聲魯存所謂可傳於後者不洵然歟顧雲山飄渺室隔百
里不能飛旣共賞而佳文茂質俟與目接恍遇其人益增
惆悵耳爰序而歸之

石城縣琴江公館記

原載通志

董越

今藩臬之於郡縣皆有分司獨郡行縣無之者蓋闕典也
闕而補之可矣然必以力以財顧安所出乎曰民而已民
困且敝而欲為之是誠非知所當務者使為之而財不費
民不勞亦何憚而不為乎雖然亦視其人何如爾石城舊
無公館郡吏至多就城隍廟西一室以居前人嘗欲改為
顧時有未可成化壬辰貳守程君以行部至乃謀易之時
人和歲豐邑且無事議謀一協庶民子來旬月之間財力
悉具君慮速成全美或為民病也乃獨新其廳事越明年
癸巳燕寢門廡之制始具焉於戲君之知所緩急如此不

謂其人可乎自君之創今又八年塗墜垣墉不無非舊邑
令三山吳君慨念成績次第修飾之今規制煥然無復遺
漏猶慮後人或昧所自而莫之嗣葺也乃走書徵予為記
予嘗獲泛觀今之吏於民者矣棘欲者病民翫愒者廢事
幸而無是二者則又多涉疑畏過所當為輒護曰勞民傷
財在所不敢是誠不敢也然不有聖賢之經訓在乎夫長
府之改不必改也南門之作不當作也然作臺而民悅之
修泮而民頌之古之人亦未嘗全不用民者文王固不敢
當也魯僖之事獨不可幾乎今之二千石古之諸侯秩也
其佐諸侯之亞也昔人謂郡之於州猶州之於縣今郡之

尊禮藩臬既若是其重矣而縣之視郡乃獨使之不得安
所止於義得乎此程君之舉所以無過而來吳君之嗣葺
宜也說者猶謂作臺興學與此不同予曰不然夫臺作固
所以察災祥學修亦所以興教化然今百里之地能無災
祥可察乎教化可興乎若必以此為厲民則是漢儒所謂
召伯心恐煩民故茨於甘棠之下者邇古及今宜無如是
之鑿也程君名鷓字大鴻河南鄆陵人以賢科發身稱廉
能於顛者九載吳君名文瑞福清人問學早得師承異乎
俗吏是皆有可書者故併書使刻焉館之規制丈尺與時
之共事者則具刻碑陰

虔州柏林溫氏書樓記

原載通志

宋太學說書

李觀

南州自豫章石上其大州曰吉又其大曰虔二州之賦貢與其治訟世以為劇則其民眩衆夥可識已雖然吉多君子執瑞玉登降帝所者接跡虔無有也疑其傾而越襲瘴盡餘氣去京師愈遠風化之及者愈疏乘其豐富以放於逸欲宜矣故人許褒其家石城虔屬邑也比年夏踵余門道其鄉進士溫革之為人曰溫君少時求祿而莫之得慨然自謂不得諸外盍求諸內不在吾身宜在吾子孫乃圖山泉美好處莫居柏林堂下因作講學堂房數十楹經始之日獲五銖錢五萬於地士友珍之或以青錢名其館凡

石城縣志 卷八
書在國子監者皆市取且為樓以藏之性寬靜用地利自足不與俗人爭訟買直孳孳以教子弟禮賓客為已任琴歌酒賦夜以繼日許君不妄人也今其所稱與向之疑者不類是虔之福與自古聖人之德業舉在於書聖人者非其智造而巧為之也天之常道地之常理萬物之常情也天地萬物之常而聖人順之發乎言見乎行事君得之以為君臣得之以為臣父得之以為父子得之以為子兄得之以為兄弟得之以為弟夫得之以為夫婦得之以為婦長得之以為長幼得之以為幼反是則爭奪相殺未有能已者也今溫君聚書勤勤是有意於聖人有意於聖人則

豈一家而里鄰黨庶乎偃伏之矣然則虔人之成大名至大官蓋未易知尚何吉之媿哉柳子厚於楚越間山水如小邱小石石渠石澗猶有記以啟好游者今有人為藏書之樓非特山水之勝記之以啟好書者不亦可乎余欲一至欄邊四顧天外江山進前文史相對清風兮我扇白雲兮我蓋召屈原於湘魚之口呼李白於海鯨之背漱寶玉於餘潤拭明珠使去顛酒酣興盡交揖而退其樂可言耶而未之得也皇祐五年秋七月唐子記

重修石城儒學記

大理寺卿甘士价信豐人

虔屬邑凡十有二惟石城遠甚界在臨汀其地阻山谷其
民局於聽睹猶面墻然是宜不足齒於文獻而顧嫻然禮
讓相先才賢不乏若夙閑於詩禮孔孟之教者則以學校
作人績効匪誣也載攷往牒石城儒學創自後唐長興厯
宋而元中間或以兵燹或以荒僻遷改建置無慮數四迨
我朝高皇帝統御海宇即孳孳加意文治一時邑令若喬
澍邵子鏡輩咸以興學造士為兢兢思稱上旨第學齊語
者且置之莊獄而俎豆絃誦之業乃肆於郊外荆榛之區
野外綿絕識者鄙之無惑乎人文之不競也宏治中賴道

府議徙今城內安仁門南邑令何繼宗廣文魏爾經紀其事正德間圮於洪水嘉靖間奪於豪右隆慶庚午卒未邑侯蔣崇朱江相繼復其侵地而鼎新之更藉義民鄧國和熊汝魁增建尊經閣大成坊而規制復備矣萬厯以來知縣事張仕通尹思敬唐繼顏遞加修飾而登雋則寥寥前侯唐元嘉始從彤家言稍遷文廟於左以避中路之衝明倫堂後馬尊經閣又後馬經費則以帑金得請若干自捐贖鍰若干士民輸助若干於是棟宇鱗次巋然煥然不獨位置之得所而已無何廖生應兆舉於鄉若持右券開先肇美唐侯之功居多歲甲辰雲間黃侯以文學高等來牧

茲土每徘徊廟舍間與學博盧君日相商確增修所未備而千載黌宮至是始稱完美豈偶然哉黃侯欲勒石紀成事屬陳生輻熊生兆正黃生侃遠徵言不佞予惟漢史循良文翁興焉以能易蠶叢魚鳧之俗為衣冠文物之鄉也君下車不鄙夷下邑而首營庠序竟前人未竟之功可謂知所重矣然修學者有司事也而自修其學者諸士事也石城之學由來遠矣前之諸君子不憚屢遷以求其妥後之諸君子不憚增修以求其備所為諸士計無遺力矣爾諸士自計所學得無有未妥未備者乎孔氏以聞義不能從不善不能改為憂而孟氏則曰萬物皆備於我此聖賢

石城縣志 卷八
學問所為自求其妥且備者今而後諸士務日乾乾遷善
改過繕性修身必吾儒分內事毫無頗僻毫無虧欠而後
即安夫豪傑之士無待猶興剗今上春秋鼎盛日廣厲學
宮期得真才以需任使即頃者覃恩一詔求賢若渴士類
靡不彈冠詩稱壽考作人於斯為烈諸士何幸身親見之
異日挾風雲起巖穴紛紛嚮用蔚為國華上之不負朝旌
而下之不負諸君德意賴多士勗諸

祠祀邑侯唐公碑記

熊懋官 邑人

曩計借北上蹊鄒嶧古道辦香拜孟夫子祠闕壁間宋故
相趙詩云老佛橫流感後來諸方宏構切雲開先生立教
尊周孔其土一祠尤草萊讀竟令村僻長歎傷世與道而
交喪也予邑蠻序其不鞠為草萊者幾希邑侯唐力捐改
作報於上得可遂排衆議而成之觀其勸助之語反覆千
百言大都以闢異端崇正學為宗旨嗟嗟侯言其志趙君
之心而有關於世教者與夫吾道肇自庖羲氏歷堯舜禹
湯文武遞延聖緒至尼父甫集厥成其刪述垂憲之功甫
揭日月於五倫肅冠裳於萬禩天地常位常泰者皆其賜

也遊聲裡以還占籍青衿而染濡其教者或蔚為上佐或分秩犀工類能彰軌綬猷彼二氏者詎曰窅然難知哉即登般若岸了元北門祇自詣其幻而貝葉琅函內景琳扎諸編毫無裨於世教胡蚩蚩之氓殫財力而恣祀之金利瓊宮如穆天子宅化人者滿宇內薦紳竒表士復為之左袒是遵何說也予石城雖僻處一隅然夫子之道如日中天無幽勿燭諸誦法孔子而自才者亦往往不擇地而生趙宋之世張巫盧許諸君子炳炳麟麟蟬聯汗史竹而晉公不對錢穀不上計錄尤炙人口頰疇非產於西華之麓長於琴灞之濱者乎茲我侯一新廟貌山川式靈孚而為

人文安知不有如晉公諸賢作於其間而與宋才相頡頏哉侯實大有功於名教且大有造於後學矣其肖像而祀之也固宜先是學址屢徙迨嘉靖紀年壬子再卜郭中之西南隅廟與堂並列堂後更峙一閣位不中蟠勢復卑窪今建廟於故址之左十步許堂徙廟之背閣復徙堂之後左右遞有建設規制大備方位且俊卓而偉皆侯心上經綸而形家言勿與也說者謂是役也其功在百世斯報在百世固諸生建祠意也噫側冠服於宮墻分藻蘋於俎豆仰止勿諉義同瓊玖石士其深於報者哉侯名元嘉號三台南直太湖人其捐贖之日朝夕經費之勞與夫董役集

石城縣志
事之名具載他石

邑侯尹公去思碑記

熊懋官 邑人

邑處之上游蟠山帶川氣細邃未琢故民生其間有質直而無流心鳴琴可理胡吏茲土者徃徃以通都劇邑之政繩我石譬享魯烏以大宰投虎豹之物以生且完也溺其旨矣予邑人以論邑俗則民樸茂事本業不識工商六博滑稽游俠之態有古赫胥氏風倘以操切剝割之寧不豕突以忤法網哉則治民之難士高視濶步素負氣不請謁亦多負奇能文倘以秦士賤之以吳下蒙蔑視之寧不岸冠捲袂譁囂以逞則待士之難邑生齒不繁率撫吉閩建之民輻輳躑躅主常不勝客若不計安土著復墮藩籬以

石城縣志
揖之疇其不螟螣我良稼哉則御容之難邑山公綿曠類
鄰境畚民雜佃其間易相惑為盜鄉稍有藏者輒彈鋏以
攘取之間蹤跡至官復以疑似釋焉疇禁其不蹂躪我鄉
土哉則弭盜之難噫此四難者必改弦易轍乃稱理歟法
貴宜民改貴因俗則以我尹侯觀之矣侯生甘泉湛先生
理學之鄉而淵源漬之豪宕俊發風雲逼人又羅浮山靈
特殊異焉由獲鹿教移宰石城其廉介其光霽其文章政
事則院檄民謠備之無論已試語其難者則子我氓此止
懸杖減緩因緣為理因民喜也而入其道因民憂也而辨
其故若養赤子食餒人而曲得其情隱胡民之難理厚我

弟子員則課士有餽造士有錄高宮墻建書院皆倡首以
風吾民青衿以奮胡士之難勸以治客旅則有犯無赦者
罰無貸其狡而健者輒置之法而復申令之故流寓以肅
以制盜賊則嚴什伍之法構捕獲之賞遇警則緝兵星發
必蒐其穴而雉羅之故境內以靖侯之令我石也地則彈
丸當不展其畧時則兩期又不意其能而大都可觀紀者
如此此之以得民矣夫民心感則恩感之深則去而益思
故韓子譽嘉樹魯人即封殖之以寄愛召伯一憩甘棠後
為南國勿剪之植况侯有不可忘之德而一去遂不復思
則南陽之謠成都之石琴民顧不辨此歟昔范宣問不朽

石城縣志
卷八
之業於穆叔豹曰太上立德其次立功其次立言謂侯
立德立功立言非乎侯諱思敬號龍門廣東增城舉人時
以內艱行併記之

重修東嶽廟記

熊懋官 邑人

石城治列四隅郭中有坊曰進賢岷此獨甲一邑且彬彬
質有其文俗稱馴雅舊以進賢名之世祠東嶽行宮暨唐
臣張忠烈公巡大都能造福於民者每春秋賽禱牲毛醴
帛狼藉二祠之廡下歲祠不輟顧日月積久風雨蠹淫楹
腐桷摧幾將墮焉且殿之四窠地高而中窪當春雨驟注
輒水臙庭中經旬不可洩衆議新之而患無財計遞歲劇
譙之費可縮節以充之又不足一方之髦士復輸索金以
盈其券甫閱歲而數百金具矣乃簡鄉之耆老而能者董
其役鳩工之巧聚財之良高者墜之窪者培之木石之窳

者更之方隅欹側者或質之官或易之民以恢宏之中帝
宮左王祠右土地祠棲神有寢禮拜有階肆設有廳以繪
以塗且堅且緻工不越暮而成刊石且有日衆乃索予言
託之手乃駢鄉人而告曰而知修廟嚴神祀矣抑知修行
以迓神庥乎彼東嶽職降生之柄其神類好生張君死難
於唐其神尚節予里中人能植僵起仆睦族和鄰毋虐寡
毋噬貧毋跳梁角觸而健訟即仁厚一腔與東嶽好生之
德符矣能砥礪名節樹植綱維不剝廉不毀耻不機械儼
譎而詭度即正直一行與東平尚節之心合矣彼神之英
爽若懸照若持衡若秉鈞歆爾廟貌復鑒爾賢否其貺之

多福可蠡測歟藉令新以廟不新以行神明其貌不神明
其德雖天宮雲構祇作神羞予聞太嶽之靈即秦封勿昵
睢陽之守至羅雀鼠勿移瑣瑣茲一營繕欲緣此以徵福
左矣且而坊稱賢而俗舊稱雅即無論冥錄謂何第一顧
名感舊寧不暢然思崇鄉黨之訓哉金石可腐斯誼不磨
簋豆可湮斯理不爽願里中共勗之諸書耄舉忻然稽首
曰敢不佩厥規以代工祝之告遂書以畀之為新廟記

建東門浮橋記

熊懋官 邑人

邑控章貢上游琴灞二口滙遠城左東渡其要津也無論
衢交八閩即田園樵牧悉屬河之東其渡者日接踵不可
指數春夏山水叢注時多沉覆之患秋冬僅夫以小木墜
橋抱柱歲有聞者予愍然心惻久矣而力不償也茲壬寅
予宰兩邑轉清漳告致而還宦筭僅二百餘金遂作而歎
曰與其株守以遺未必賢之子孫孰若蠲之作慈航普度
眾生遺石城百世利願予孱瘠不任事迺簡邑之俊又得
十有二人畀以橐金授以成算鳩工聚材諏吉而始事焉
時黃氏諱餘慶者雅與余同捐資殫力共襄厥事而邑之

尚義者復得一二憫予志而低昂助之事見以辨始於壬戌之仲秋迄腊月而功畢時邑宰唐學博盧暨不佞俱絳袍瑣帶辦香祈靈於河伯隨鼓導率諸耆老登航以濟是日也朝曦明媚虹彩飛揚白叟黃童舉忻忻鼓掌賀橋成矣第成之一時易垂之久遠難彼易朽為新之費倘無所藉何以裕後復捐資若干市田一百四十六石付原佐事十二家輪環收掌以為遞歲修橋計頗有操堪輿之說以簧眾者謂茲橋置之下流恐不利於邑予曰古者徒杠輿梁原為病涉者設非營風水也藁木橋規則視浮橋高丈許且未聞害而今孰云不利况非構木繫石如雲龍霹虹

勝何所損益而西津寂寞南渡湍流而不利於建置安足庸喋喋為也或謂邑中田產星佈上游一旦絕流而渡得不為過難厲階乎予復慰之曰虔建兩關於東西實文成奏議為給餉籌也石室偏處一隅舟車厄塞防此當為瘡疖而民間私舫之橋疇敢以謀利况上鄰盱眙東界閩汀西通寧瑞皆菽粟運輸捷徑獨此橋能擅其禁哉予嘗遊學二粵每一鈎帶之水輒橋以濟如通都大邑則長橋卧波南北並峙未嘗稱病而么麼一橋乃嘖嘖煩言何杞人之過計也茲與鄉邦約自此以往無生遷徙之謀毋開閉糴之竇毋漁贍產之利則琴水之陽永覩不利之石矣余

石城縣志 卷八
奚贊若捐造之士造作之費具載碑陰

遷建

邑令董應譽
常州人

文廟記

以顏氏之子事孔子猶父然則人間世無貧賤無富貴於孔子皆有子道焉祀孔子祀父也尤有司分內事也譽庚寅來茲適寇餘拜先師於荆棘灰燼中意慘悽淚落忽憶壬午之歲譽病劇凡三夜皆夢孔子坐荒坵大樹之下譽歛生平所為文讀而善之拜起徬徨四顧殘柳依依儼然昔之夢景數雖前定實增悲辛辛卯夏譽集士紳謀作廟咸謂舊址弗吉分司之廢址吉請遷建於上臺上臺曰可就中進壯麗之說者必欲高大而丹華之譽尋龍捉脉

文

覺此地小如錢總不宜渠渠之屋譬諸縫人不相體之肥瘠與長短而概紐以寬衫足袂恐終不得衣被之益也姑無論凋敝之極草昧之初物力不能支政使可支而禹卑宮室吾無間然孔子之靈亦何庸壯麗耶為惟是以繁縟堅緻為務由廟而廡而門揣合時地以稱令模落成誠有如史遷所言觀孔子之堂有依徊留之不能去云是役也聞有以為乞力者嗟夫子事父何功之與有彼災廟而無所逃罪者固非夫子之徒作廟而引以為功者又豈孔子之徒哉

建城隍廟記

陳露邑人

順治壬辰冬邑之城隍廟成邑侯董落之先是神像幾罹於乙丑之寇燬得廟祝負出以免故先生倍敬靈焉復訊坐客曰城破前三日神以繇辭告人有曰須防洗刷此全城果乎客指目露曰即某所乞得不誣益歎靈之奇也因呼廟祝而誠之曰掃除必潔神乃留處是職也爾但之母怠乃一酒間碎務輟填指點之餘先生之顏欲澀客互相慰藉先生於是語其情曰余少孤依外大父讀已為長子撫孱弟一寒暖舌佃遠方者半世今幸第而官乃又值創踐田之於草萊者什其八城之嚙於河流者什其什無有

官舍而僦民居聞警輒怛怛心動我辰果安在哉卒之寇
不復犯者實賴神威有以默禦之耳語罷歔歔而坐容率
伏默無答者露笑曰語君知卦之長男體與乾父西北坤
母西男中南近父中女近母而長男獨遠居乎父母之外
遠乎父母惟以成其德多其能也雷於天地為長子以其
首長萬物為出入除害而興利也而雷之聲聞及百里諸
侯地百里取象乎雷先生昔為諸生則亦以長男遠父母
德成矣能多矣今筮仕則以長男為令而聲教百里害日
除利日興天人理數適相冥符豈偶然哉先生數年內無
日不招還流離者而安集之入以神於廟如官於舍捐祿

而作是廟碧瓦鱗鱗華棟岳岳神得所棲矣夫先成民而
後致力於神允矣古君子之道者也昔鍾離意為堂邑令
無官舍其民趨作亟成先生恐煩民特不事營建耳如其
事石民之亟成寧詎讓乎堂邑者哉嗟夫守土者求民之
無怨也神之無恫也難矣今民且悅而神且樂民不必言
奇靈如大神其所以陰翊而福先生者蓋自今伊始也於
是先生色稍霽命以伯雅斟陳子而謂陳子滑稽

通天巖竹廬記

陳經法 邑人

去城十里許透而南得奇石凌空突竅山泉幽澗間窮山之巘則為谷為盤佳木葱籠蔚然尤獨秀也山倚石為巖啟一竇工若鏤鑿幽塊中有日月星斗光相映射因名曰通天巖謂其破山之顛而出也巖側有利負石阻林危磴四踞惜山無常產僧無常住去來一如白雲舒卷而已山之右石整剝喙自列層次整盡則下瞰山麓阡陌映帶如繡俯眺小徑巧作蛛絲矣至若月滿東臯則明珠之出匣霞映前溪則丹錦之鋪茵鶯鳴魏松則新韻之引螢蟬噪深柳則杼聲之促織夫且寒山一片戴月歸來爐煙初冷

冰骨俱仙眼界到此真身寄流雲手摘碧落呼通帝座俯
小乾坤也顧上下千百年來山靈湮鬱不得一開生面惜
已甲子仲春物外生陳子呼集朋侶搜羅捫石躡屐同春
顧而樂之闢山徑誅茅為廬間從吟咏之餘解衣磅礴或
弄泉幽澗或聽鳥林間或鋤龍孫以作供或採崔芽而論
志是則此山之勝也廬之週東惟琅玕敲風則響韻來清
琴映月則媚影入扶疎是則此廬之勝也顧廬不長存而
山則千古然山雖古而得廬益勝是有山不可無廬猶有
山不可無刹有廬有山有刹而後山之高巍偉碩隆巖坐
曲與夫一竹一石一泉一壑呈遊子之履齒者皆可得之

心而形之目矣天啟甲子八月既望陳經法記

署篆邑侯李公生祠記

黃新邑人

任以行道也外自方伯連帥以至庶司百執事事無大小
 期各盡其道以報朝廷而子元元其間最難者莫如令令
 於民最親饑寒寇盜上未及聞而令聞之以故保惠之必
 周而防衛之必力雖然為令難為署令而賢尤難令之報
 最期以三年署則權宜時月誰復能為邑建功業垂令名
 者而明府李君不然甲寅之變前任無備遂至城陷逮總
 鎮劉公率師恢復大破賊於寧都之江口旋命李君來署
 石城始至僅殘柱斷礎僵尸白骨聞其無人李君勞心招
 徠哀鴻復集未一月而甯黃復以數萬眾寇攻圍甚急李

居巡守與邏卒同甘苦散粟以給貧者使日久登埤而無
內顧憂相持半月兵至賊敗賊退益修城濬池鍛乃戈矛
礪乃鋒刃時刻戒嚴僅獲一歲之安至丙辰二月寧黃襲
據通天砦窺伺城邑又結連汀逆以鐵騎數千來寇書十
數上而兵不至人心洶洶李君乃慨然示曰賊來益眾外
無糠粃蟻子之援所與圖存者民而已矣城破其如雨民
何吾義無降理爾寧恣悖耶於是兵相感激勵兵決戰李
君言曰賊勢雖盛營壘散漫攻之易易乃授以方畧將午
兵出北門殺賊奪礮會連日雨賊不利火攻出擊之勝夜
漏將盡賊架梯攻城播木矢石如雨城不能上環視賊營

人靜煙浮知其必遁率眾要之大捷所獲馬匹器械留備
城守餘悉散之即率兵勦通天砦賊自料莫支徐引去夫
民也出死力以保餘生唯上所命豈臨期數言遂足動人
耶緣李君夙昔潔清自好不苟取民一絲一粟催科之下
丁決田荒申請蠲減徵輸設法不為繭絲見人訟獄輒勸
止之勉令歸耕遂至圉空刑措是防衛之力者復保惠之
周也况建武聖廟修城隍廟北郭真武閣功績班班可考
哉吾聞有道者膺廟食李君功業在人宜乎尸而祝之不
已也爰立祠闕聖廟左附古忠義並祀千秋云

遷建學宮碑記

邑令陳嘉

學之設自上世有之而其制代不同周人以成均之法立學政而合國之子弟以此教之先儒曰成均五帝學也有虞曰采廩夏曰序殷曰瞽宗周曰類宮所謂類宮半其辟雍之制天子曰辟雍諸侯曰類宮也凡立學者必先釋奠於先聖而其制亦代不同先儒曰若唐虞有夔伯夷周有周公魯有孔子各自奠之所謂國故也魏正始中始令太常釋奠以大牢祀孔子於辟雍而以顏氏子配自是天下之學莫不崇祀孔子吁祀典之隆未有盛於此也隋制州縣學每歲釋奠以春秋仲月上丁唐因之遂定以孔子為

今上御國

先聖顏子為先師開元以來復并祀曾閔犀弟子下及邱明高堂生之徒為制愈煩而天下皆樂奔走執事以後為羞蓋夫子之在人心天下天下一日違之則不能宮居而粒食人心一日違之則入於禽獸故地無通僻人無今古言治者必以建學設教為先務也琴川自南唐時始有縣而學宮之建在未始有縣之日去縣治北數里太極觀之左歷宋明嘗遷徙無定宏治中遷小西門內之南隅後更徙城北之清源廟左嘉靖間復遷小西門西南之隅初經兵燹乃徙南門舊分司之故基久而益圯極四十五年余不佞奉命承乏茲土甫下車察之輿論

天子

僉言

方重道崇儒親祀闕里書萬世師表頒示州府縣學所在廟貌壯麗改觀而吾邑學宮獨頽廢不堪每朔望辰拜瞻仰惻然余曰是余之責也夫於是教諭熊公尤鼓舞贊襄與其紳士大夫就商於余請諸各憲咸允所請又從形家言以小西門之南隅為吉於是鳩工擇吉而謀徙焉自四十六年四月至五十一年八月凡木石丹黃陶築工資之費其白金以兩計錢以貫計粟以石計各若干或出私俸或出義助咸勒名於石昔魯僖公復泮宮詩人頌之而不書春秋先儒以為學校朝廷大政常事故不書耳而余

必一一言之者正以躬際隆平上有古文之

主

川一邑士無秀樸皆勇於義亟修舉學宮如此則其被聖

人之澤深而見化於上也蓋有不知其然而然者余不佞

得與諸生揖讓於新宮之中聆工祝之歌飲玉瓊之酒以

詩頌

天子

太平之功而周覽學舍思詠作人異時

國家收儒者之效其多琴川之士也乎遂書之以為記

捐修明倫堂碑記

黃道漪 邑人

國家休養百餘年世世相承崇儒右文之治超軼千古邇來

更

勅令

所在郡州縣修理 學宮整飭倫紀教育士子之法疊布

諭旨

皆各有成書石城學遠建自邑侯陳公於康熙戊子歲費

衆貫不下五六千金而倫堂內外尚多曠址墻垣未戢禮

門義路闕未脩也乙巳南豐譚先生以司諭來會東明朱

公亦以甲科來宰吾邑二公皆名下宿儒相助為理政通

人和均以興賢育才為己任文風士習翕然丕變比年以

來學使者按郡類首稱石邑先生文教之效亦已較著而

前此學宮之缺軌次第補綴歲庚戌更鳩工庀材於學宮左右為禮門義路使出入是門者惕然知警倫堂中前建龍門壁書大學首章以垂教皆出先生清俸為之未嘗呼將伯也夫明倫之名肇自朱子不為泛泛勸學之詞而奮筆書之曰明倫蓋人受天地之中以生莫不具有五常之性而其端先見於倫紀之地仁此之謂仁宜此之謂義履此之謂禮知此之謂智信此之謂信順此之謂樂君臣之所以定父子之所以恩夫婦之所以別兄弟朋友之所以順而信推而天地之所以位萬物之所以育元會運世之所以循環而無間皆此之維持於不息使一有或息三綱

聖諭

淪五常教人道漸滅其變故豈淺鮮已哉今先生於此重加之意其敦行勸學之旨不必條註而於朱子及之至意深切著明學者儘可微會諒不為先生止為本齋觀美焉可知也石人士既仰悉其意而重歎此舉之累先生也則曰此我輩事奈何竭吾師清俸為耶於是各醵貲若干以少補先生之項適予以病告歸先生語予曰茲事已戢經始於庚戌二月落成於本年仲秋磚甃工料共費若干邑當事暨諸紳士各有捐助甚不欲沒其實君幸為記之因各如所指之數而書於石並及先生即堂寓教之意先生諱佐字右民建昌南豐人學者稱譚盱豐先生

遊西華山記

陳 調 邑人

西華山邑西近障也頂右窩建一刹其中週匝綿亘約五
 里衣翠幙翳林木疎密位置一天然圖畫也登臨者從西
 關出不里許便已作嶺坡行及麓山與村落徑分磴級峻
 嶂蒼松偃蓋炎夏中可撒手躡屐以登倦則隨磴級三三
 兩兩高低踞坐各矚目寄情領畧於指顧間逐步留連可
 竟午循而抵山門迤邐劈出若造深徑矣入寺僧辦茶供
 畢少憩由佛寺左登仙壇左側聳出老松三五株皆百年
 間物蒼龍怪像摩雲擁雪亭亭作刹竿豎想及巔無峻級
 踞階坐俯視羣山盡成一飄渺於陸海中赤者其垣墟翠

者其田疇吐而出者波濤迢遞疊疊而駛吞而止者島嶼
縈洄曲曲而通一城若浮漚泊浪接郭北煙火亘二里許
宛成一琵琶像江水自北抵西南中流一線河東千家若
斷若續樹影迷離堆三聚五其外則平原沃野目所窮際
十數里遠可跡而探東嶺袤長峯巒雜沓從此視亦成平
坡惟東華聳入雲表睇而左右嶙峋磊落若浪花之滾月
者邑龍脉也覽景週迴曠蕩無際何有鄉不遠矣返而下
從佛地嶺涉縱橫不下二百尺竹木叢蔚環叢僧舍所謂
曲徑通而花木深者可歌可咏可長嘯又在推窓見遠山
上得之余與寺僧有禪乘契或數宿或旬浹乃放還恒擬

十景詠復次雪公八景韻又復恒有雜詠蓋以此為足耐
人誌興云

重修

邑教姚芹南城人

文廟建造義學碑記

今上乾隆之六年季春蒞任石城教諭越孟秋纔四月耳即承

邑侯王公德意倡修

文廟建造義學願予於合邑紳士非素有生平之歡也又非

有蘇湖教法足以致人之信服也而一舉萬全出於口實

報於邑恐合邑紳士之格而不行又恐眾人或阻於一二

人之異議也蓋其功非一朝夕所可竟其費又復在千金

以上圖始既難觀成不易故惴惴焉慚且懼願石邑紳士

咸尊崇

先師人樂造就人材聞余此舉欣然以為美鼓舞之贊襄之載
筆書捐無難色鳩工庀材總理有人分任有人絕不計其
功之大事之難亦絕無一有異議者之阻撓於旁也夫士
為庶民之望紳士見義不為何責乎庶人紳士之所趨庶
民爭趨之而又非可強而致之也平日無所以取信於人
者有背而去者矣斯舉也紳士議立總簿三本散簿八十
本九里民人無不從紳士後踴躍捐輸紳士之素履石邑
民風之古處於茲俱可徵而信抑予更有望焉我
國家重熙累洽教化涵濡已歷百年今

皇上復益加漸摩務期士習民風幾於淳古吾人共生斯世思

所以仰副

聖天子愛育之至意為士者以修身立品為庶民倡而於

朝廷之訓諭官長之條教無不兢兢遵奉如斯舉之同心樂

赴斯導迎善氣感召天和黌序之中當必有環璋奇傑之
士接踵蔚起文章勲業顯當時而傳後世者斯舉也創始
於乾隆六年仲冬越次年仲冬功幾成余不幸遭大故以
憂解任邑侯王公必欲余圖厥終留為書院掌教辭不獲
復黽勉從事再閱一期而告竣

文廟雖仍舊制而修葺之丹雘之又覺增巍我而壯觀瞻義

學鼎新構造間架規制迥別尋常且工料俱極完固務期

石城縣志 卷一
可以經久後日縱有修葺亦易為力其廳堂厨房什物器
用具備又得請於 撫臺陳頒發

御書

及其自纂書若干部傳流交代 道憲朱巡縣親詣閱視
賜以額題蓋莫不樂斯舉之善也其九里名傑士姓名及
樂助姓名數目若干工料用數若干并新舊贍義學祖田
若干俱勒石以垂不朽余不揣愚陋援筆而為之記

遊西華山記

劉飛熊 金谿人

大地山川西江最為奇特深林迴溪幽泉怪石所在多有
石城山脈屈蟠地勢攢蹙巖之險者結為竦峯之陡者盤
為砦石之峭者聳為峯巖之岷者鬱為峒峻嶺翠律奇觀
夥頗距城六七里許有西華與東華對峙別號烏石嶂山
之刹為永福寺稱附郭名勝予客黃氏西軒西華日在望
志事倥傯不暇遊四月七日備筇屐出西郭門層累迤
攀才二里許有奇石界道縱橫如枰為棋盤石未幾樵童
牧豎纍纍列坐其間如棲鴉之點寒梅則為撐石又數百
步隆然而起扣之咯然有聲為柳石路折而南迤邐又折

而東一徑虬松蒼陰夾道危巢壓壁石磴盤空極紆鬱陡
峭之勢巔巔至香爐峯下環峯數百步始達寺門門建石
枋署不減楞迦四字入詣佛殿爐峯卓立殿前僧堂靜室
即林為蔭因巖為堵妙析奇致已乃出寺後拾級登顛仙
壇在焉蓋西華絕頂處也山之麓有五龍潭述者謂昔有
一婦投鍼其中驚出五龍破空而去真妄存而弗論俯視
城闔宛如檀槽卧砂磧前輩擬似琵琶良然琴江一綫犀
峯四圍所謂若竦若若嶂若巖洞輪囷離奇瑰瑋特絕
如天馬如海濤如劍戟之森羅如樓臺之結撰丹霞紫霧
晴嵐空煙頃刻百變尺寸千里高瞻遠矚心目俱暢此時

胸中足吞雲夢八九矣復循故道轉西嶽謁性期禪師真
身一嶂來朝三峯拱掖塢位在中中開小牖睇眎之色身
金漆靈骨稜起目光炯炯蓋若編貝屹然危坐望之如生
呼之欲出神乎神乎夫儒門務實釋教談空自古聖賢空
文垂世不實而實四大名山肉身現在雖空弗空似以言
教則訟以身教又不之從其此婆心總歸無益奈何奈何
嗟乎區區西華奇趣如此望中若三仙竦鴻石若丈夫嶂
通天巖倘一登臨又當別有天地矣暮歸途中人告予曰
吾琴有餘於山不足於水未為勝觀予曰不然熊自丁巳
歷金陵登鍾山過泰岱游京師玉泉諸勝水山盈歉各不

相能南歸過杭眺吳山錢塘山川自相映登然西江幽秘
岷奇自足千古虔州三十六灘琴瀑二江鬱為龍口水如
是是亦奇矣又多乎哉歸憇西軒先拈山中景四題成詩
四首又遊覽一首登西華絕頂一首念性期禪師玉身之
奇作塔聯扁字各一繼乃伸紙記遊并及往復問答如右
時乾隆九年四月十日也

龍峯石壁記

俗呼龍骨味

陳自鈺邑人

距村數里有峯環峯皆石大小鱗比土人寵之以龍骨號
高百十丈山顛多泉竇火流金燦不涸乾隆庚申九月歛
土石迸裂牧童於流水石壁上突見字樣駭歸為余言狀
疑信參半拉同學諸子往踏層折攀援崖石華峭崎嶇險
仄慄慄凜凜若墜若覆漸陟高巔一望雲奔西插筆峰其
所走分折而北若瑤嵐若鴉髻二岫橫列又有天馬山巍
大石峙其南連者斷者卑相附高相摩狀難窮寫山行四
五里聞水聲若雷吼內有夾谷懸瀑數十丈砰訇而下悍
怒激閉束之為湍觸之為漩正向者牧童告予處也石壁

石城縣志 卷一
問果有獨閑子來進思漢輔八字大如斗列二行端楷饒古健不款尾同遊驚說不知錫何代潛形幾載誰實銘而志之或曰此天工或曰羽人釋氏皆為不經以惑世其說游謬無可準獨惜僻壤荒坵間厠古跡風明雨晦弗為好古者所見其湮沒不傳者可勝紀哉

饑樓記

黃軒臣 邑人

樓肇於雍正九年癸丑原名觀化或以為觀太虛之化機或以為觀造詣之變化其為觀也曠而遠軒臣不才均不逮此繼又舍此僑寓會鄉故樓名不傳乾隆八年夏抱病歸故里樓所貯物十無一二存惟樓尚無恙時值年饑升米二十錢猶不可得食然饑不至死亦似有天幸者秋成後人皆有食新之樂而吾饑依然殆與饑為緣者歟爰更名曰饑樓夫古今不獨予饑也范史雲為萊蕪令當時有甌塵之歌孔奮為姑臧令葱韭自奉類皆怪於頤養予今霑化歸蕭然囊橐然猶不至於饑硯田可耕尚足溫飽妻

子近則癰疾為病坐卧一樓監河之貨又所不屑而饑已甚是病而饑饑何足病哉第羨姑臧之介不聞有樓而吾尚有樓吾賢遠遊古人樓不負吾且負樓矣樓之高吾十尺有餘其廣不數步所容者圖書數架外竹床木几皆依書為位置入必俯身坐惟容膝非饑有素者不能架旦夕安是樓也獨樓外四面皆空可供遠眺山則右西華左東華天馬標峯聳前迤北諸山鎮後水由琴灞匯城北流於城東南西隅者悉右旋而繞於樓側又直前而環於南波湖漣漪疊紋縹澱四時花果植木蘭蕙桂菊桃李梨栗松柏楓樟地所宜種者亦分列平園曲塢中至若候虫

時鳥因風送聲居室中者或不及覺予從樓聽之因不親切當余苦饑時試一推窗高山流水鳥語花香竹青木翠悅目快心饑乃頓忘是人之所豐而我獨嗇人之所嗇而我轉豐也怡愉之下遂為之記記成客有過予者曰夫元龍之百尺休文之八咏地以人傳非人以地傳也今子一樓而嘒嘒作記將謂此記可永此樓乎何所見之不自量予日記以紀實予實久於饑又實饑於此樓予不自記後誰為我記者且以志饑不足為予病而予之樂饑也客聞而退因濡毫而書於樓之壁

遊鴻石巖記

邑令孫緒煌

司訓楊四峯為予言鴻石之勝者屢矣每舟過其下或筍輿中目力所到輒心嚮往之乙未秋予以病羈石丙申春月病新起因四有查書之便拉為同舟遊舟行四十許里抵山麓越日乃以肩輿往及上徑仄不盈尺石齒稜稜如噬人狀俯瞰目欲眩凡十數折始抵石門石門者即志所云石門翠合者也去石門數武復南折而上造其顛書室佛堂近在目前因捨輿步行入下層之左有書室二所一額養浩蓋取諸孟氏言一額披雲亦大約志其高也其右則僧人誦經堂遂小憩啜茗以解渴叻生某曰山之右

有乳泉清冽可飲曷煮之予欣然唯之出寺門西折而上
循磴可數十級則芝岫書室在焉四面開一窗縱橫三尺
許圓如鏡四望渺然生某云新晴晨眺村煙嵐氣合而成
雲如波濤涵湧千態萬狀厥名雲海一歲可四五現是日
也微雲蕩漾波委鱗屬雖未必如海之奇亦畫景也稍北
上為梧岡書室址與芝岫聯門西向屋則面而南有窗一
規亦做芝岫而成者因覽壁間舊題有梧岡壁月之擬意
在斯乎生某曰是不盡然每歲三秋望夜皓月橫空如寶
鏡嵌奩望去恰在箇中非晨夕於斯者不能遇循屋左上
為獅頂磴愈窄四峯率諸子攝衣而登予股慄不能從擇

石之稍平坦者趺坐焉南望遙山一帶橫亘數十里如列
翠屏左繞而右抱如曳素練者為三溪隆隆然如車中箱
浮浮然如釜上蒸者為庄舍綠沉沉上合而下分者為村
樹如帶結如蛇糾者為田間之阡陌如蟻動如猿升者則
山壁間之田夫樵豎也時黃生殷尚為余言此山逼肖獅
形上為獅頂觀音巖為獅口左右側出之支塹為獅爪余
笑曰若然則寺前之池環山之草若木不皆為形形之獅
毛滴滴之獅乳乎而山麓之小山則皆其肉視犀象孩撫
熊羆者也因思佛堂之顏以獅吼者借山形以類佛法類
非無取由右徑復返梧岡稍息足從者以新煮之茶進且

云山背有積米巖拾不能盡巖側有出油洞至今油暈然宛仙蹟也蓋往觀乎余以其說近幻且日漸燠不及往其地若繡谷諸館亦未暇遍覽遂故尋道扶健足而下迴望高峯煙雲繚繞恍如天上仙人忽謫塵世石邑巖壑之勝當無踰此而為亨田黃氏一姓故物齋館鱗比其子姓世肄業其中得以挹覽靈秀煙雲風月朝夕之勝領畧不盡其黃氏子之幸歟余將去此言旋不能與山靈訂重遊約則予之不幸也因徘徊不置援筆而為之記且繫以詩時丙申三月望日

溫家學捐卷貲記

黃鶴雲邑人

今

上

乾隆二十年改寧都為直隸州瑞石隸焉踰二年州建試院歲科則學使者按試石去寧百里聞使者下車示期童子乃遵期而至至則紛紛投卷未免倉皇擁擠歲戊戌堂下溫家學見而嘆曰是可按名預投以一人任其事但乏公費耳遂慨然有捐貲志呈請於學使者願助田以供卷貲學使者允其請而嘉獎之歸則告於學呈於縣縣轉請於各 大憲時 藩憲秦以嘉惠士林獎之家學念已所有之田星散難於經理乃另買腴田數處載淨租貳百石零

費白金一千六百有奇送學公簽管理以歲息為歲科院
試童生卷貲併廩保公費大比則作鄉試入闈卷貲斯舉
也捐助之盛為邑第一而向學之誠亦見一斑夫義冠博
帶日挾一卷孳孳進取似誠於學然懷仁慕義之心或鮮
有焉家學幼失怙家赤貧竭力治產以事母錙銖累積可
謂勞矣顧念切追遠則捐租百石以崇祖祀其他贍橋梁
助廟祀亦指不勝屈繼又捐金以修城垣倡首以創書院
斯舉則所助尤盛所益尤多所謂見義必為者非歟雖不
沾沾佔畢其誠於慕學可見也昔鄉賢溫公廷贇宋寶元
中詣闕上書願罄家貲市監書以惠後學既得請建柏林
書樓招來遠近學者給以廩餼時江李泰伯為之記家學
為廷贇公之裔其嘉惠之意先後同揆韓子云莫為之前
雖美弗彰莫為之後雖盛弗傳家學其繼繩而有光於前
者矣予嘉其意遂於志館記其事家學字師勝國學生斯
舉之服其勞者次子國學生雅瑗也

謝公祠碑記

邑巡檢 沈國泰 山陰人

石城當前明季流寇輩屯躡雉城邑迄庚寅順治七年武進董公應譽來受縣事招徠安輯請撫請蠲日遑遑不暇給於是青回殘晦燹火漸升乃復城隍堦堦完廩葺廨當其炙野霖原必有勩勞勩於役役者惜微文無考効用雖勤其奚由著進二年而謝公以巡檢佐治來猶然在凋敝之會奔走左右提掖僵頽承頤噓風車依於輔公之況瘁從事胼胝不懈可想而得邑書不詳其實茲固不能無憾比董公以積勞成瘵三乞休不報十年竟得以憂去而公遂卒於官藁葬衙署之右麓夫職無大小惟其克盡不

然羸博之遺骸亦止與鋒鏑游舞同冷迄今過厨嶺下猶指三尺土識之曰此謝某之墓何哉想當日署中相與構小祠展祀非但無忘爽鳩季前之意亦更無忘勞勩之義也而吾獨異王道奇朱瑞桓者為何如人豈生同來死同壙抑或骸拾後先而合之既不飽於烏鳶遂并留其姓氏雖骨化形銷鄉關路絕而河月荒寒神明相聚不至孤子作若教之鬼三君子其有以樂乎此矣故即以附於墓者附於祀謝公諱成字一仰餘姚人家籍北直馬蘭峪王朱皆關中高陵人謹書之以備考云

築壩濟城河記

邑令朱一慊涇縣人

治河猶治兵也防水猶防寇也兵不教于平日寇或發于臨時倉卒無措喪師敗績不待再計河水亦然道光元年余謁選得石城宰仲秋蒞任進父老問地方疾苦僉曰邑之患莫大于城河河發源苦竹嶺遶城西而南入大河自乾隆五十年後日形淤淺至嘉慶五年山水異漲沙石壅涌決城北之堤防而故道遂沒河身漸淤為平地平地又積為高埠西南兩面陡漲沙洲外高內深形如釜底每遇春夏水盛汎濫橫溢闔城惴惴有昏墊之患治苦無術已歷有年所矣余聞之悚然趨而環視信如所言雖然病成

痼疾藥石宜投束手無方難聽自死早夜以思寢食俱廢
去年冬復進紳士而謀之黃子顯猷告余曰欲治此河必
先于城北清源廟建石壩以禦大河使不得倒灌然後堵
决口去積沙引歸西門故道但工費甚鉅驟難為力耳余
曰試可乃已既而思之欲事半功倍惟因水刷沙其庶有
濟乎今春鳩工匠購木石匝月而北門之石壩以成大河
不得內侵矣于是大聚人夫堵塞决口雨盛則沙水並驅
雨霽則益挿齊舉如是者數月河乃顧執浩浩然由地中
行惟决口正當其衝屢堵屢敗訖無成功爰築石堤一道
長九丈高八尺遂臻鞏固不可動搖地方人士扶老携幼

觀者日數百人以為今而後吾全城其免於魚乎不可以
無紀余曰是有司責也曷足紀雖然河之淤沙之積不始
於今日由來者漸矣當其始一杯土耳使用千百文錢聚
一二十夫稍稍導之沙即日去淤即日除焉有所謂河患
哉乃日積月累一杯者轉盼盈尺盈丈若邱陵之不可為
力譬之草竊姦宄立可撲滅今歲不勦明年不緝遂至蔓
而不可以圖晏安鳩毒其是之謂乎今幸以父老之請邀
天之福治有成功然成之甚難廢之甚易繼今以往其能
無沙淤時乎是在後之君子念成功之不易時加利導毋
復使淤積頻仍外高內深又至于搔首無策則地方之福

也余之願焉

濬城河續記

邑令朱一慄涇縣人

河之工始于二月初吉越七月既望大段告成有基弗壞
 若作室家既勤垣墉惟其塗墍茨若作梓材既勤朴斲惟
 其塗丹艸始基之矣其所以善後者正未有艾也蓋水性
 不東則不急水力不深則不厚性不急力不厚水雖大而
 沙積亦壅塞不能去是河在平日涓涓細流蜿蜒一綫深
 不過咫尺寬不過襟帶狎而玩之若甚卑卑不足道者及
 其疾風迅雷甚雨窮巖幽谷萬派爭流溝澮田塍一時並
 注如高屋之建瓴一往莫禦平地忽成巨浸漫迤四出茫
 無畔岸勢雖浩渺而沙仍壅滯不行且繼長增高焉何也

無以束之故其性不急而力亦緩也予每於雨盛後巡行周視頓悟其理因復于南北兩岸各築土堤數百丈護以草卉植以楊柳不待春融而已發榮滋長根蒂盤結視石堤為尤固堤畔各有曠土數十畝南岸為官地屬西門外北岸名魚子寮官民各半向以水患棄為石田今則可樹藝矣生員熊利文黃鵬翰請將魚子寮已業若干畝捐助入官予甚嘉之水患既平兩岸荒地皆可開墾所得微利可為每年修補之資此後經理有人經費有出善後之事畧備若有意意外鉅工則有司及諸紳士善為之又非區區小補之術所能備也矣

河南築石壩記

邑令朱一慊

善治水者不與水爭地相川澤之宜而利導之高下緩急順其自然孟子所謂大智行所無事之謂也若夫山水暴漲挾汪洋恣肆之威攻岸决堤迅若拉朽繼之則愈驕順之則愈怒不有以殺其勢而遏其流將為禍益烈而莫知所止邑瀕大河河之南為仙源坊其地背山而水繡壤相錯林水深秀隱然一大墟落獨怪人烟蕭索戶口凋敝一似盛極而復衰者豈父老而問之僉曰是遭河患數十年於茲矣河在當年狹而深繚而曲環抱城隅勢若襟帶坊枕河之南平曠坦夷入恬物阜素稱樂土四十年來北崖

長而南岸消土崩瓦裂浸浸乎有吞吐沉溺之勢今之沙洲昔之沃壤也今之懸崖斷岸昔之田園坊表也今之水中央水中沚昔之街衢巷陌井竈也愈進愈逼月異而歲不同後之視今將更不如今之視昔矣可奈何予曰是則然矣聽之已乎僉曰欲治之無經費有經費無善術予曰否否天下無必不可為之事而更無坐以待斃之理河自萬山中來其性悍而難馴如泛駕之馬跣跣之士亦在御之而已因謀于黃子顯猷購巨石數百萬當衝建石填二座長七丈高一尋有奇後軒前輕橫亘中流如石鯨之屹立固于砥柱儼龜趺之盤踞重若邱山東流直下於此迴瀾巨浪浮空帆隨湘轉由是北岸之沙嶼潛消而南岸亦藉以穩固九月廿九日經始冬至前日落成用費千有餘金出自修志眾善士樂助餘資鳩工庀材黃子實襄其事援筆而書之用以誌始末云爾

Blank columns for text on the right page.

重修尊經閣並祀

文昌記

司訓阮麟書

國家崇尚經術嘉惠士林頒發各直省州縣

御製

御纂

欽定各

書以及註疏史傳廣儲學宮俾士子通經致用崇其體制
典莫鉅焉嘉慶六年

詔天下郡縣崇祀

文昌以太牢追尊先代祀典特隆石邑儒學東隅舊有隙

地前司諭譚公請於當事闢其地為尊經閣度藏經籍又

為魁星樓以廣學舍諸生多肄業其中一時稱盛歷數十

年而棟折榱崩幾同瓦礫 邑侯朱西蒲先生下車伊始周視學宮見閣頽廢特甚慨然曰尊經所以造士造士所以治民烏可以聽其頽廢為也會有修志之舉乃進諸紳士而謀之僉曰是不可為緩圖踴躍輸將庀材鳩工不數月而竣事題曰尊經崇其制也前為魁閣中祀

文

昌巍然歸然瞻視一新諸生乞余記其事余曰經者先聖大賢扶植世教啟迪民彝之言也劉勰云皇極藝訓其名曰經自經學不明於是異端遽起曲學爭鳴孟子謂經正則庶民興士為四民首知尊經則不流於小技不惑於歧途凡修齊治平之理身心性命之微可以探得其旨歸而

皇之

人心風俗翕然皆歸於正是故可以治己可以治人可以治天下國家周程張朱之心法臯夔伊傅之經綸皆於尊經得之所謂不易之至教不刊之鴻業也斯閣之建崇我藝訓萃先聖之心傳奎藻天章聖經賢傳照耀日月凌爍古今郁郁彬彬淵乎尚矣而學者謂文之所聚莫盛於文昌方今

文

教章敷聿隆祀事考古孝經援神契云文者精所聚昌者揚天紀春秋元命包云文昌六星理文緒太史公天官書謂斗魁戴匡六星即文昌其位在紫微垣北斗臨焉是文昌與斗魁大有造於文治也夫文莫備于經治亦莫詳于

經經之設久矣詩書易象經之體禮樂刑政經之用由體
達用窮流溯源文教之興以此文治之盛以此士不通經
不足致用諸生肄業於斯知其所尊而尊之細繹

御纂經

籍不為末學所歧不為採覬所囿尊所聞行所知本諸身
加諸民於以正人心厚風俗入為醇儒出為名世不負
賢宰之所期以仰副

聖天子

尊經崇儒之至意豈不盛哉是役也經始于道光三年
季春告成于是年孟冬董事者貢生廖體坤監生黃顯猷
鄧式宗其相輸則紳士廖皆堂等十七人也凡此皆例得
書

羅鏡吳仙壇記

邑司 阮麟書 新建

鬼神之說聖人弗道誠恐傳其說者務為離奇詭異將至
于離經畔道而不自知然神道設教先王未嘗廢之天時
之譴人事之愆王政之所未及惟神有以維持而調護之
則神之有功于人者大也羅鏡之月巖舊有古廟相傳為
豫章吳左房先生先生長于詩古文隱居不仕其子某舉
孝廉官閩縣尹歿後皆于此山為神每逢災祲祈禱輒應
里之人敬祀之歲庚辰閩廣疫氣流行蔓延至石十室九
空道殣相望醫者乏術不得已而乞靈于神神降筆示藥
方全活無數又書警世文令人傳誦以解其厄大旨謂人

必尊君親上孝弟忠信而後可以回天謹神之覺世亦至矣哉夫天者氣也天之與人相接者亦氣也和氣感于上則天降之祥寒暑時風雨節屏生茂育百昌繁盛而嘉祥見戾氣乖于下則天降之殃陰陽愆時序失水旱凶荒疾病癘疫而災沴生說者謂天時之偶愆不知皆人事有以召之也雖然物不可以久困久困則傷天地之和而生氣盡矣故陰陽有消息之機剛柔有變通之用而剝復之理于是乎在神也者代天以宣化即代天以立言所謂妙萬物而為言也萬物不能自育而聽命于天天不能自為而寄令于神聖人不語神而未嘗諱言神神亦政教之所不

廢也容有占冀者為余述神詩松風蘿月涉筆成趣其天機清妙飄飄乎若列子御風遺世而獨立殆詩之仙乎余謂詩詠事也不可以徵實神仙以救世為功能除一切苦厄斯稱上乘故有金丹靈藥之說今神之救世如此則謂之神也可謂之仙亦不必以其詩而仙之也記曰能禦大災則祀之能捍大患則祀之神誠有功于民則擴其廟而祀之固崇德報功之所可類而及者也廟建于磔角亦曰泉石寨奇峯峭壁虬松百株左右冷泉與松聲相贈答側有月石光瑩如鏡神之靈棲息於此則以為風雅所寄也亦宜廟為正廳一前廊一其上為仙樓顏曰吳仙壇著

其氏也肇功于道光辛巳之春訖功于壬午之夏基址為
溫益周嗣孫公輸其廟則十方鳩集而成另有樂輸碑記
麟書司訓是邑讀其文以為有關於世道人心不可以其
誕而忽之也遂書之以為記

廖太初先生傳

魏書人

太初先生姓廖氏諱應兆字聖符賴之石城人也大父昇
耀父顯璧其先世系出寧都之懷德鄉後五代時有廖融
者以隱逸高士稱書已入逸民傳宋世舉於鄉者廿有四
人舉進士十人曰安節曰顏曰光曰李高曰經曰壽翁曰
祖謙諸人者為最著奉祀鄉賢者十數人古志有今志無
公其後裔也寧都與石城三國孫吳時本同為新都縣南
唐保大中始析縣為二故公遂為石城人世居小松里以
詩書清德著公生穎異九歲通禮經篤學敬謹惟禮是循
弱冠游陳大摩先生門每稱為千里駒未幾為學諸生

試輒冠軍萬歷癸卯科舉于鄉為禮經一人甲辰上春官
屢不第念二人垂白欲及親存而致尊養始筮仕判太平
府歷署廣德諸州邑皆有廉能聲復司漕河總運運倅積
弊以艘居奇載木值贏貨往往致愆期或又有滲沙和土
之弊公概為清除趨運兼程得如限天啟中逆璫竊權建
三殿更派運舟載五金百貨刻期峻法旗役苦之於時漂
陽溧水間軍人謹嘯揭竿淮撫莫能戢以公有御變才機
公往單騎至淮戒其交構均其勞佚軍亦素聞公清望於
是數語而軍譁立定淮撫表其才可大任其署當塗也三
王各之封國蠲舟駢填將毀沿河民舍以牽百丈公設桴

筏沿岸濟之民居得全者數萬家其署繁昌值久旱齋心
懇禱澍雨三日夕故江南九院交上其最凡五獎十一薦
得誥封二人公榮之故事叙遷首論望次以俸初不循資
中葉以來始重資凡考得最者必春官進士始得內轉科
部苟資屬鄉舉考雖得最平叙也故僅叙陞遼州牧加四
品服俸已而以親老乞終養其視膳循禮卒如孺慕時歲
大稔俸餘悉聽二人分給親族諸貧乏未嘗有德色其居
鄉也謝絕請託有冤抑必力為伸之致有陰受德而不知
者越歲甲申聞自成陷燕京因向北悲涕遂致疾如癡如
狂往往涕淚被面賊首張自盛掠邑城公家口悉被害僅

存孫攷掖公得免倉皇奔廣昌復與孫攷相失旋悲慟以
致公享年七十有六性沉靜以和尤孝反生母許繼母王
事王一如所生中外無間言居喪不如俗尚事浮屠動必
恪循家禮居常蔬水布素自處甚約與未達時如一或譏
其近鄙公笑曰謀業肥後則鄙爾我固澹泊無營自幼成
性豈矯耶識者信之所著有醉泥草著耳癭零等集皆持
世之言以未登木盡矣於兵火惜不傳 又論曰書往遊
石城雖未瞻拜太初先生顏色固已望廬而敬其為人既
得交其孫李義攷儼然清白之風因傳公之行事公以禮
檢身無失德者如彼其善政及人又如彼所謂善人者非

耶乃祠其身家之酷一如此天之報施善人始不可知此
史遷所為致疑於伯夷傳歟然書聞之故老云凡石城之
先達賢大夫其父母得封者率皆焚黃唯公二人乃生得
榮封且壽考終養其子孫復多絕傳者唯公得賢肖子孫
十數人此其得於天者已獨優矣蓋公死節義得祠不酷
不足見節義之難或天所以成公之名而為後世不墜之
教乎迨考其邑志初載公入儒行後載公入忠臣斯不沒
公之節義耳

烈婦黃氏傳

黃 韶 邑人

烈婦名晚清者世居城之北去聚壤百數奮即郭外黃明
經宗臯之女也幼多溫順以謹肅聞及笄適邑之上流堂
下溫太學諱先標之次子晚清素守正目無旁視口絕羨
言居必重閨衣必絰結事姑孝為婦順歸逾十數年未嘗
見其喜怒值明末石邑界山僻盜賊烽埃路岫相枕晚清
念之嘗語其夫曰如此亂離為婦得從容死垣首亦厚幸
矣倘有不測為夫矢之迨歲之己丑邑吏失守盜賊數千
羣北援而上赤火若砒礮一邑俱燼晚清獨抗聲大言曰
天乎天乎為婦當此何敢貪生以瀆倫紀要當以脰血濺

此賊吾誓死無他矣夫婦扼腕切齒悲涕長歎凡所把握之物約數百金棄之倉皇間各自逃死賊衆排趕而入中有一賊持刃劫晚清晚清瞑目唾罵重扶其額賊以手攬之驅策而去晚清求死不得一路罵不絕口會賊就道舍燃銼藉人頭為席所獲子女不從者悉格殺之決腹解節以懼晚清晚清瞪然不顧視死無難色賊遍目所擒者無踰此急令左右密護之母令其死晚清尋顧自盡賊以勁木白梃擊其腕晚清大罵賊且怒且却又令老嫗以利害誘之晚清感憤愈深哭聲動地因正色謂嫗曰人生與父母爭氣只此志節耳苟生以辱不如死以榮貪生負義爾

自為之予不敢且不恐也言罷以髮蒙其面觸頭血滴地示無回意賊憤甚拔刀割其面大呼曰吾欲活汝汝自污吾刃汝以死為快耶吾今不令爾生亦不令爾死惟汝自揣之時天寒觀者股栗茂才溫朝銳以嫂叔同難自負隱痛遂置不敢問姑徇祥聽之日既莫賊抱頭拉他婦而睡晚清四顧寂然從小竇而出溺於舍旁之深渚駭然有聲賊亦驚起薄而視之其渚中猶僵宛不自止賊遂以小磧投之大吃而去厥後賊彌兩月方退朝銳亦脫難踉蹌歸且詞其事聽者太息予亦歎惋不已曰嗟乎丹可磨而不脫其色玉可碎而不可改其白蓋操與冰霜俱凜志與

日月爭光雖古之君子不過也世無張奐劉班其人詎忍沒而不彰吾因感其事而為傳

黃貞女傳

黃軒臣 邑人

貞姑黃姓名澄德生而秀慧弱齡習女紅即精妙旁涉女論語列女傳等書父鵬素與廖副戎國用善國用為次子期茶求婚遂許之未及娶國用卒期茶行次不得蔭往粵西投軍門入伍圖進取去數年而姑父死比長其兄承運遣人賫書往粵趨茶歸完娶茶復書云當日臨行誓必得官願弗遂魚顏歸故里令妹當別耦此書所以志也運匿其書不以告運妻燕間時微露意謂廖子薄倖宜早為計姑不之應未幾母亡期茶卒不歸廉知當年復書決絕因大慟曰身已無歸父母俱喪吾命也乃投繯復仰藥皆以

家人亟救得甦自是足不出閨門雖內外至親鄰曲婦女造門罕接見見亦無一閒言人皆畏憚更無有從旁以他語撓之者雍正十一年姑年四十有三族叔新蔡公謂貞志可以彰教也為立傳附載家譜所傳皆壬子以前事又更七年語兄曰廖郎無後終不血食吾今年五十當歸廖為立繼以卒吾志兄遂致書廖族具素輿迎歸巾車過處嬭女簇擁輿睇觀輿夫若不能行蓋好善人有恒性不約而同也姑自戊午歸廖於今八載撫繼子甚有恩衣食外稍有贏餘為議婚良族以待娶廖姓稱曰賢母賢母固非貞女莫為也予與姑同族行長予一等素未謀面而心景其操更合前後事傳之以告來者

贊曰孔子論次列國名卿獨以衛甯武為愚不可及趙威后問齊北宮女嬰兒子訝其不朝有蔽淑德按姑生平心事良苦殆聞嬰兒子之風而起耶然使姑生而男子入朝為臣則武子之愚殆將及之孰謂古今有異量乎而篤骨肉之恩始終成姑高節者徽行亦不可掩哉

鄧觀亭先生傳

黃鶴雲邑人

鄧瀾字觀亭號達泉鄉賢斗光之曾孫也二十四歲舉於鄉再試於禮部不過雍正二年恭遇

世宗憲

皇帝特恩挑選以貴州知縣試用歷署婺川縣知縣威寧府通判黔西州知州所至皆有治聲其署鎮遠縣篆也值所治為鄰境購買米驟貴瀾請發廩平糶大吏持以成例留十之七瀾視民困甚竟盡發之曰拯民以獲咎何辭秋成命親屬赴糴襄漢間以實其廩事聞大吏甚嘉稱焉題補修文縣知縣將之任鎮民爭載酒道左表其竿曰活我萬家為賑饑故也尋調普安縣知縣中丞鄂公彌達過其

署與詔時務大悅宿署中奉給惟以樸素因自陳謝鄂笑曰知君廉久矣此吾所以重君也後遷都勻府都江通判時悍苗踞都之上江瀾奉命於來牛董建石城城固甚遂為諸方保障雍正十三年逆苗猖獗台拱古州清江丹江八寨皆叛脅都江苗長同起不從曰吾不忍負鄧公叛苗拘係之乘間脫歸告瀾發所屬苗助官兵防守八寨苗不敢犯陞古州同知抵任單騎往各寨撫循苗皆惟迎遮馬前告曰公若早來我輩不叛矣瀾以善言諭之為清釐逆苗絕田一萬八千一百七十六畝設屯四十堡安軍二千五百一十九戶歲獲米三萬七千七百八十五石更董建

朗洞要隘處視其空地勸令開墾成畝不成畝者令植杉桑柘無曠土焉時省其耕作農畢則命各堡嫻技修械乾隆六年粵西逆苗石金元等勾結殺掠黎平府屬南江一帶及永從縣治瀾傳集苗民親率捍禦境內以安更嚴設保甲稽查奸匪禁兵役無得侵攬苗民漢奸有入苗寨誘教為非者亦捕查斂迹苗俗舊有刻木剝牛跳月避標之陋瀾為革其俗更設義學給膏火延師教之時親課獎賞誘掖諄諄以親上事長睦嫻任卹為諭自是蒸蒸向化幾與冠帶文物侔矣乾隆七年護黎平府知府篆捕獲苗首逆楊銀金楊老三等遂以卓異引

見陞思州府知府乞假省親三閱月乃之任歷二載懇終養
予告歸事母以孝聞居喪哀戚毀瘠服闋徵赴

闕

以衰病懇辭家居二十餘年青鞵節杖一如韋素謝賓客
寡言笑惟以經史自娛生平仁心為質律已甚嚴而待物
甚恕為政一以推誠保郵每遇折獄必平反再三所矜全
甚多故所治民皆愛戴之弗置年八十六而終

邑侯李公傳

邑令朱一慊

涇縣人

李公諱大謨直隸玉田縣人嘉慶辛酉以舉人大挑一等
奉檄來江廉明幹濟冠絕時賢委以艱鉅措置裕如上游
倚重者有年壬戌冬來涇石城下車之始進紳士者民訪
以地方之利弊慨然以正風俗恤民瘼為己任邑之俗儉
嗇福急而好訟雖匹夫匹婦自經於溝瀆亦必張大其形
狀矯飾其情辭真若剝膚折體冤慘不可勝言者一詞具
而比屋號呼一獄成而十家破產由來舊矣公知之于投
牒時令告者確指受傷之部位具結狀以進然後詣視立
為決是非釋冤抑懲誣罔毫無寬假于是奸民懼而澆風

始息邑之人知公之果有以庇我民而保護矜全之無微不至也翕然戴之若慈父母焉子夏曰君子信而後勞其民公之蒞民民信之矣八年冬奸民廖廣周蒞事公倉卒間派兵役練鄉勇謹防守嚴堵截不踰月而根株淨盡雖匪徒舉事之日狂風驟雨有若神殛之者亦公之恩信孚于民而衆志成城以臻此磐石之固也公在官儉以處已寬以待人養士愛民善政不可殫述而削平禍亂保障城池尤功之卓然不可磨滅者也事平以功晉秩旋授吳鎮同知逾年奉委來州經理考試石邑士庶如赤子依戀父母而不忍去後卒于吳鎮邑人聞之設位祭奠道路多行哭失聲此固沒世不忘之徵亦後此祠祀之所由起也

答韋石城書

魏禮人

伏讀手教懇到惻誠如禮之下劣願何以得此於明府哉其為愧戴莫可窮極蓋君子之言信而不華抑亦其素所根植者然乎不在於所施之人然習見尊遂者之竿牘罕能有是也介弟辱臨通其識度足徵家學之淳而明府遂久在野人意中尊中憲公之立身垂裕於後者亦畧可想見及明府蒞政鄰邑九里之潤彌歲沾濡禮守分蓬茅未敢自通名字不謂明府之謬先德音篤摯纏綿有如此也爾時從子有姍事越三十里山中淹留旬日繼日肯作楚廢視坐間室以故報復遲後罪不可原矣竊惟民者天之

心也故夫世有治亂道有污隆而天地仁民之心無變也
得行其仁民之心者守令而已守雖近民然又不若令士
君子思於天地合心展發其素所學問莫為令若矣雖然
世之牧民者曰慈祥愷悌善已後之君子以刑獄不施為
仁或奸蠹并容或豪強剝噬一意縱弛民之事不治而枉
抑無由告好人暗啞強邪逞志而曰吾慈祥愷悌也不亦
大滋民害乎夫以懇到惻誠之心行釐奸剔弊之政殆庶
幾矣是故嚴誣告之法及其珥筆者斷行三四則訟可清
也聽訟不厭煩細行隔別之方參伍以索其變則兩造之
情無遁矣出令無反汗不可行者不著之言著之言者必

行也則令信而民知適從明保甲連坐之令奸無所容覆
則盜猾可潛消也耶律有言興一利不若除一害生一事
不若減一事則民安也何者天下之事莫不始于利而終
於害害既除則利興矣今之弊政昔之善政也節宣其有
無緩急為之先後則輸將不罷也推求生息之道稅政之
妨民者視吾力請於上而去之則物阜也聳才能尊有德
以身率先懲不若教者仁恕涵濡之則化成俗美也是故
因其俗以敷吾政因其政以善化吾俗聖賢之道不外是
也然此亦大吏行之難令行之為易易何者區域有經提
封不越百里而民之情偽俗之淳澆令皆耳而目之不似

送制者之遼濶而待聽故其施設近而易周未畢景可身履其地也夫令之政人命為大是故嚴保辜之法則故殺嫁禍之奸不得行彼懼彼人之死而償其死醫治必力是全活二命也方其始聞令急即其地親驗視審定辜限雖婦人孺子牽過足以證佐則真偽無所遁此召康公所為有美說之甘棠也如是罹於強死者寡矣雖然近世之令益難為也胸縮於功令掣肘於大有司君子亦惟存其心盡吾圖而已明府以惻誠虛下之懷又適履斯任必有得其要且識於時務者故敢呈露其愚以請質正焉尊論文語禮豈足當然正大可持稍揭之以示後進承委中憲公

傳以繩樞草舍之手使造五鳳樓不幾拙工駭而走乎然台屬不得辭幸寄示懿行崖畧勉成以就斤繩耳賤疾未健造膝之命當在異日

隱窟雜誌 載說部

溫 華邑人

李漢老云古者詔令多矣天子自為之故漢武帝詔淮南王令相如視草而光武詔鄧禹曰司徒堯也赤眉桀也使臣下代言其敢為是語乎

仁廟初欲封皇女下崇文院檢尋典故王洙等言唐制封公主有以郡國名者有以美名者文皇幼女在宮已有晉陽之號若明皇女封永穆常芳唐昌太華皆為美名乃詔封長女福東公主次女崇慶公主蓋用明皇故事也

閬州有三雅池古有濟此池者得三銅器狀如酒盃名有三篆曰伯雅季雅仲雅或謂劉表一子好酒常置三爵大

受一斗次受七升小受五升趙德麟云恐是盛器也非飲器也予以問曾存之存之言古人軀幹大升合小王仲弓傷寒証治論湯劑註云古方三兩當今一兩三升當今一升然則存之之言信矣予按廣韻盃字註云酒盃雅同音則雅字蓋借用三雅乃盃也無可疑者趙德麟論法帖據唐人李涪刊誤云短啟出晉宋兵戎之際國禁書疏非弔喪問疾不得輒行尺牘故羲之之書云死罪者是違制令故也予觀文選任昉沈約為中丞時彈章云死罪死罪是惶恐語不必謂違制令乃云爾也

今世燒香理火蓋有所生楞嚴云熱水沉無令見火是也故事館職每洛陽貢花例賜百朶并南庫法酒此二者麟臺故事不載故去之

取覆勝予蓋兩制見宰相之禮自建炎中庶官亦用今則布衣以下皆通用之

四六文用經史全語又須詞旨相貫若徒積疊以為奇乃如集句也楊文公居陽翟時謝希深與之啟云曳裾而前士會無君子者解組弗顧公其如蒼生何文公書於扇曰此文中之虎也蓋善其用經如己自出特為豪健楊文公有重名於世因草制為執政者多所點竄楊甚不平因取稿上塗抹之處以濃墨傳之就加為鞋底樣題其旁曰世

業楊家鞋底或問其故乃曰是他別人腳跡嘗傳為嗚喙
自後舍人行事遇塗抹者必相諺云又遭鞋底
汪內相勸主上聽政表云漢家之厄十世惟光武之中興
獻公之子九人念重耳之獨在蓋佳語也或曰移上句為
下句則善不可加矣

入境初詳

邑令董應譽常州人

贛州府石城縣為急陳廢邑情形併進書生蠡見因時救
弊懇憲批石以酌政要以造殘疆事聞之無民不可以為
邑無城不可以為邑無民而有寇不可以為理無城而有
兵抑不可以為理今日之石城直廢縣也萬山伏莽百竈
成灰昔歲屠城之餘孽踞險為巢此日駐邑之游兵呼庚
索餉卑職於本月廿二日隻身冒險前來入其境無田疇
無村落滿壑骷髏入其邑無城郭無人民境垣墨突舊令
之琴堂安在牧馬嘶風

先師之俎豆何存杏壇鞠草簿書已付咸陽之火錢穀久充盜

踰之囊前署縣者曾無片紙交盤新蒞任者併無一椽舍館將欲養兵巧婦炊愁無米將行派餉窮民肉潰醫瘡且也槐槍未靖嗷嗷之鴻鴈集澤猶驚因之稼穡未謀濯濯之石田開荒莫賑全城盡圯修築之巨費難望鬼輸眾戍絕糧煨燼之荒陴誰呼雨粟卑職忝此牧民之責曷勝猶溺之悲譬之同室阻饑恩先望腹醫人療病急則治標則今日因時圖治之大端必以救死扶傷為首務芻蕘之議哲人採焉卑職之所請於憲臺者有五酌其要而審其宜蠲荒第一彼嘯聚者必無戀於茲土則撤兵第二兵去矣而民無所怖則招復第三民聚矣而眾効其力則修城第

四城修而田可治也則勸耕第五如是而生聚而教訓三年之後石民其有瘳乎卑職不謂廢殘之邑不可復興也雖然此數端者揆之有緩急施之有次第職之力所能為者職能言之而亦能行之職之力所不能為者職能言之而伏冀憲臺主之如招復修城勸耕三者職之所能行也如蠲荒撤兵二者職能言之而非職之所敢必也是不敢不急陳之以仰望於憲臺者也憲臺必念此石之民命雖殘丁口猶在版圖石之泉源雖竭錢糧猶在正額則所以為今日之挽回扶救者誠不容緩也如以為職言匪謬連賜批奪候題石民幸甚卑職幸甚伏乞照詳施行

石城縣志

清賦

邑令董應譽常州人

贛州府石城縣為申明歲額以定催科以清

國

賦事竊惟錢糧準於歲序額賦出於田疇無不以地方之

開復為始江省之有石城界僻閩汀山深道阻頻年變亂

叛服不常七年二月大兵恢剿始得開疆復縣卑職五月

終旬抵任則正兵屯於邑寇熾於山之日也幸得閩鎮王

總兵援師夾擊數萬逆徒乃遁逃出境時在七年六月初

旬矣前此城郭人民悉化為叢荆茂莽室廬田畝久付之

烈炬洪濤蓋刀兵水火疾疫死亡之災石城罹此最奇而

最慘也其在六年正月以至七月則逆將金聲桓為官田

廣業署縣而脫石城之膏八月以至十一月奉憲臺委署
縣郭自修竟死賊亦城為賊踞而屠焚者四浹月合縣矜
民無一箸之遺倉庫錢糧無秋毫之末矣則考石城之賦
額者無論從前數載民田已耕未耕額賦有徵無徵定當
以七年開復之期為石城納賦稅之始然後察其荒稔酌
其蠲徵俾殘疆下吏乃可奉循畫一而無擾於百姓卑職
切憲臺恩庇凡七年後田畝蕪荒丁口消耗俱蒙洞悉矜
憐所報荒冊奉疏入告但目今所甚苦者六年七年八年
糧款均奉憲檄一概火催卑職招徠四散殘黎且復聞風
竄徙邱隅黃鳥不暇歸棲是所憂不獨在錢糧也夫七年

八年之併徵小民雖甚荒殘猶知分誼卑職竭蹶支持隨
徵隨解若六年地方未入叛圖大兵未行恢剿以印官身
首異處合縣老幼屠焚之日而一概追其國儲兵餉不大
難乎卑職待罪此方不避斧鑕為此陳請仰祈憲恩詳察
開復年月併從前偽逆踞縣情由仍移咨達部石城縣六
年未復不致一概派徵以免驚魂竄逸庶石城殘黎世沐
生成之造矣為此具申伏乞照詳施行

三請撤兵

邑令董應譽常州

贛州府石城縣為固懇撤兵以便保殘修廢事竊惟刀圭
可以療疾不可以養生干戈可以勘亂不可以圖治今日
之民見兵猶屯即疑寇之將至也富庶之民不可復予遺
之民尤可憐昔日之焚巢破卵痛未定於傷弓目前之采
蓄依樗魂更搖於風鶴是以樵子負薪於澤畔菜傭輟圃
於荒原兵馬在城五尺之童不敢過而適市其勢然也卑
職蹇蕘殘疆分當守土仰藉憲臺恩威並濟誓必再造此
方一年成聚二年成邑度非招復流亡繕葺城圉開墾荒
蕪不可為理然而屯兵不撤流民不歸廢邑時艱從何起

撤故今日之兵當撤有不煩再計而決者不撤則不便於地方者四有兵無民一不便也兵留餉匱則賊迫二不便也以兵為城而城不再築三不便也邑無城縣無市田無耕種皆曰有兵四不便也撤兵則便於地方者五民歸故土其便一士無脫巾其便二城可卜築其便三于斯族于斯廬其便四市可復農可耕糧可辦其便五下則便民上則使官久戍歸營日無呼擾夜無露宿則併便於兵於將又何樂乎舍其甚便而從其不便者卑職到任一月兩懇撤兵雖書生狂瞽之言實芻蕘一得之見今日不憚諄瀆冒懇俯允以圖便宜從事次第行舉若謂撤兵之後伏莽可虞職雖綿劣敢避艱危直以身任而覩破賊情必無轉戀亦知此斗大荒城寒灰灌莽非綠林虎負之區也况卑職抵任之初協同閩師長驅二萬之么麼大清今越五旬境無遺孽矣是以斷斷申懇撤兵而無恐仰懇憲臺軫念殘疆恩先撫字奚忍寘下吏之號呼而愆然不顧乎為此備由併冊激切具申伏乞照詳批奪施行

蠲徭

邑令董應譽常州人

贛州府石城縣為編審之絕戶應除憲派之丁徭未減仰
祈改正糧單以便徵輸以甦遺孑事竊照石城罹難頻年
百姓流亡殆盡自聲桓逞逆山寇鴟張生民陷溺已非一
日六年十一月巨寇張自威等破城焚邑壯丁俘戮老弱
委於溝壑併無弔哀魂而涕泣者矣七年二月雖蒙院部
大兵開復滿縣邱墟已成廢邑卑縣於上年五月到任目
擊心傷叨庇憲威出奇師以驅數萬之紅巾復申請而撤
貔貅之大隊親歷山野招撫逋亡迨三月以來有四民之
聚今春奉檄逐戶清編彙算新收寔在人丁止有一千六

十二丁較額少四百四十八丁婦口亦少四百五十一口不能足額隨具文冊申詳各憲奉批在卷今糧單頒發未奉蠲除照舊開徵未免丁徭缺減卑職竊思賦額以田為準徭額以丁為準目今田地荒蕪雖赤土猶堪開墾獨是人丁故絕非旦夕遂能生聚若使木蘭代父徒悲失怙於空桑如憐華杞遺孀何必緹縈之贖罪仰籲憲恩宏開慈憫急詳院部彙題改正糧單減則庶徵輸有款而殘子得甦矣緣係差徭事理卑縣未敢擅便理合申詳為此備由併冊具申伏乞照詳施行

邑侯王公德政述

邑侯王諱錫九字賜公號雲菴直隸真定府柏鄉縣人登順治辛丑科進士初任廣西武宣縣於康熙丁巳年七月補任石城時邑疊罹寇患百姓流移侯蒞任殫心勞瘁撫集驚鴻而閭井始復矣西增重垣三面浹濠以禦外侮也聿新黌序崇道重儒創立社學以廣絃誦敦教化也葺修隍廟以為民致禱祥重構太極觀以為邑護來脈又所謂先民以事神也至於聽斷公明苞苴盡絕吏胥用命惟謹豪猾易慮傾心凡強兵悍卒分防過境者因侯而斂手隣寇鴟張負固不服者為侯而輸誠遂使殘疆竟成

樂土矣其三年之間德政纍纍不能殫述尤詳于 侯之
長生祠碑記中己未春 侯膺

欽

召登內閣中書士民依依如違慈父粵稽作邑良牧雖代不
乏人求其實心行實政誠未有如 侯者茲舉其大概載
之邑乘以永垂後祺 郭志

詳請蠲免民欠

邑令王錫九

為石城苦慘已極三年並徵可憐瀝血籲天伏乞具題蠲
免以安巖疆以存孑遺事竊照錢糧關乎國用况值軍需
告急之時但有可以徵求者卑職豈甘庸碌獨是徵求之
而不得反貽地方之隱憂者不得不冒死預為陳情以冀
如神之垂鑒如石城自康熙十三年賈寇破城屠戮殆盡
十四十五年甯黃二賊勾騎數萬環攻官民死守雖城池
未陷而其鄉村之蹂躪人民之殺掠田土之荒蕪盡在天
臺炤鑒中矣至十六年水旱交臻瘟疫枕亡即本年維正
之供尚且萬分艱難乃奉文帶徵十四十五年拖欠不能

緩二反且用三甫為開徵而大聲疾聞叫號者盈庭于痛哭流涕之中有洶洶不安之意卑職恐激而成變不得已而暫停催科婉言勸諭蓋石民當累歲兵革之餘殘喘甫定驚魂未妥兼以符往未靖若追呼煩擾雖淳良性成未必因而走險恐渙散流離將供賦有用之赤子盡逋竄于不可知之地矣卑職屬蒞地方確知情形恐躑慢上殘下之罪故不避按劔之法誅先為急迫之人告伏乞軫念斯民疾苦具題蠲免不惟地方無反側之虞石民戴再造之恩將全活生靈之德真與天地俱無量矣

詳請豁免馬價

邑令 王錫九

為殘邑官民苦累馬價實難重賠瀝血籲天伏乞轉詳豁免以安孑遺以恤微員事竊照江西無府不煩難也而莫煩難於贛州贛府無縣不慘苦也而莫慘苦于石城蓋自康熙十三年賈寇破城屠戮殆盡十四十五年甯黃二賊勾汀騎數萬盤踞蹂躪十六年水旱交臻瘟疫流行百姓枕亡十七年韓逆犯境焚燬村砦殺擄人民兼以大兵蜂集桃花雲屯城下供楨供夫顛連困苦民如湯火之濡焚官同犬馬之奔走真可為痛哭流涕而繪圖難罄者也目今軍需告亟米穀豆草絡繹運贛如雨割肉醫瘡勢如鼎

沸今蒙藩憲派補省中馬價毋許擅派里民各出己資誠知民窮財盡難于歆骨動髓詎意官俸全裁豈能運鬼點金且本府倒斃馬價將及千兩尚且躊躇莫措若此節外生枝萬難包補伏乞憲臺垂念殘苦之區大施如天之仁轉詳除免庶窮黎不致流移失所卑職或可苟安下位矣按三篇王志楊志失載監生陳希聯家檢出王公德政實錄一卷具見關心民瘼洵堪與董公應譽清賦撤兵各篇並傳特為增入以見寔政惠民祠祀無忝云

勸修金口寺引

邑令郭堯京馬陵人

南安上院肇原於九奏謝先生而題簡端余可無贅矣既而僧復乞余言以為十方勸噫佛聖之空者也空諸所有世之務本而厚生者咸闢之即世之教人以務本而厚生者咸闢之夫務本厚生可也以務本厚生之念之事而極之何念不萌何事不為當其人欲昏濁銀海金穴脯林糟邱以奉百年有盡之軀而常見其不足橫臆據津畦眦必報須彌赤焰鬼國罡風爾時求所為平等心慈悲心淡泊心了不可得及其時移勢殊途逕坎坷血淚盈眶悲涼滿襟然後仰坭土大士而五體投地追懺夙業求如一破衲

僧而不可得此何說也平等心慈悲心淡泊心昔又不知何去而此又不知何來此無異情窮則反本故也以此思佛不可謂無助於大千知覺矣余以偶緣得與九奏闡發名理自慙鄙陋而又薄宦勞擾不能大相厥工勉為數言以勸大眾於戲大眾節豪華嗜慾之費而捐施淨土克暴戾強武之氣而問心古佛百念冰寒一真莫恃自然黑業消除形獄不涉而兵劫遠離此大眾極樂境界若云作受因緣又落第二義矣讀九奏之言以夢生者也余四十年內蔽障於夢而不自覺悟不敢言夢姑以己意說佛諸眾皆佛子也聞余言而或自反本則余說非贅而此工不待

勸矣

勸修

文廟建書院引

邑令王士傑

聖天子尊崇

先師鉅典宏規靡不具備而其造就人才以儲

國家之用書院之設動支公項以資膏火普天率土咸入甄

陶各當軸仰承

德意凡府州縣學

文廟無時不飭令修葺務使美輪美奐鳥革翬飛足以壯觀

瞻而安

聖人之靈至於選優生入書院則課督維勤沐教澤者炳炳琅

琅率多珪璋特達之彥誠千古一時之盛也余家世詩書
由祖及父代沐

皇恩咸洗心滌慮靖共爾位以庶幾余影之無慚余又忝以一
經幸提禮闈遽膺

簡命承乏茲土蒞任以來夙夜祇懼惟恐以負

皇上者辱先人兢兢業業不敢一毫有所苟且於今三年矣每
朔望恭謁

文

廟週視屋瓦垣墻嘗勤未雨之綢繆然而棟宇高敞風雨
易於侵蝕况多歷年所椽題椽栒不少朽蠹爰欲捐俸以
大加修葺若夫書院之名雖石城所舊有止借公祠為館

所局促湫隘學者裹足焉前任司諭譚君曾為余言學宮
左側有學地舊屋一所現在民人居住原價三十餘金可
贖之以建書院余深然之未幾而譚君謝病解組茲余因
勸修

文

廟欲遂成譚君志乃與令司諭姚君商之姚君與余有同
心且曰合二事而並舉恐所費不貲宜會集合邑紳士共
勸厥事予曰唯唯古人恥獨為君子予亦猶斯志也石邑
固多君子者聞斯舉也上以安

聖人

之靈下以為造就人才之地鮮囊者一日垂名者千秋而
子孫亦永有賴焉諒無不踴躍捐輸也爰搦管而為之弁

言如此云

告城隍祈晴牒

乾隆八年

邑令王士傑

為淫雨害稼祈求晴霽事竊惟民之所重在食食之所重在農而農事之所恃者水旱無憂三時不害也當今

聖天

子宵衣旰食極盡焦勞以下恤民瘼而上格天心屬在臣工夫誰不仰體焉舊歲早晚歉收今春米穀昂貴富戶倉儲告罄貧民俯仰無資深可憫惻各上憲留心籌畫凡可

德意

亦惟恐一事之不周夫亦謂小心接濟庶幾新穀既升豐年有慶可以無貽

聖子

天憂乃自入夏以來霖雨逾旬乍霽復昏陽舒不勝陰慘

禾稼之生意湫然無由暢茂而條達是屋留既悲於舊歲而多稼無望於新秋嗟此窮民何以堪此而且雨多則水漲田之堪塲不無崩頽屋之墻壁亦有傾倒又况石邑城垣坍塌已甚傍城居民岌岌乎有昏墊之咨俾奉

簡命

朝

承乏茲土殫思竭慮計所以奠安此民者既智盡而能索而又覩此淫雨景象愈覺寢食為之不寧伏惟尊神受職朝廷以鎮撫一邑其所司實與知縣等凡知縣所轄之土神皆得而轄之知縣所治之民神皆得而治之知縣所屈於勢力之無如何者神宜有以陰扶而默相之豈其一邑之民之悲戚欣愉知縣所必不能恕置者而神可隔膜視之

耶是敢齋肅身心為民請命惟神昭其鑒臨捲雲霧而見青天以待需雨之候再降甘霖則不愆五風十雨之期可致千倉萬箱之慶窮苦之民庶其少蘓乎夫

聖天

子無刻不以斯民之心為心各上憲及有司莫敢不以

聖天

子之心為心則神亦烏得不仰體

聖天

子之心以為心也其或知縣尸位素餐有罪莫追止宜災及知縣之身又或百姓中有不法不良者天降之罰亦知縣政教不善之所致皆宜知縣受其譴毋徒害苦我百姓也侂不勝虔肅待命之至為此具牒須至牒者

平匪紀畧

幕賓 吳鳳徵 石門

嘉慶八年十月石城縣奸民廖幹周結連寧都廣昌等處
匪徒謀逆知縣李大謨率民兵討平之廖幹周即廣周邑
之細民也游蕩不務正業好結納奸宄兇橫不法鄉里宗
族惡而畏之有福建建寧縣奸民李凌魁為已故貴溪縣
奸民吳子祥之徒曾授大戒等經又邵武人吳韜傳
以天地會暗號李凌魁以天地會名日久奉嚴禁不能哄
人騙錢另捏造陰盤陽盤之名哄誘愚民入教廖幹周見
而悅之拜以為師又石城人李奇天廣昌人賴達中寧都
人李步高胡儀書王完珍亦先後結拜師徒傳授經訣李

凌魁以李姓系出于唐妄言為唐天子後身傳有悖逆俚語四句廖幹周等相與煽惑騙錢傳徒日聚日眾漸懷不軌嘉慶七年李凌魁另案發覺經福建拏獲正法同黨嘆息廖幹周乘机恐嚇激怒徒眾誓欲為師報仇擇定癸亥年癸亥月癸酉日癸亥時謬云萬水朝宗相約于邑接界廣昌之姚坊姚姓祠內豎旗謀反眾推廖幹周為大總管四大天王用唐天子旗號劉思茂為順天王賴達中李步高等為大頭目餘俱稱將軍蓋取嘉慶八年十月十二日亥時也

國家承平日久民不知兵一旦謠言四佈人心惶惑或言福

建匪徒前來滋事或言聚有八省人馬屆期起兵鄉里男婦扶老携幼或走入城或逃入山或奔避出境晝夜號哭有畏懼自盡者兼之邑侯李公奉檄前往瑞金代理縣事地方無主益加荒亂典史程行杞查知專差密稟李公聞警星夜馳回立即通稟各憲告急請兵一面齊集紳耆商議堵禦守城及剿捕之策諭令各鄉各村團練鄉勇多者十人少者百人或一大村保護數村或合數小村結連守禦各輸錢穀整備器械于村口山嶺要隘處所一律堵截巡邏賊至鳴金傳呼為號城中紳士分段上城擊柝相守文武員弁周流巡察又石邑跬步皆山馬不能馳駟久裁

單遂挑選善走健役多名于廣昌交界之分水坳小松與寧都交界之桐樹坪小弼于瑞金交界之秋口均設寫鋪每鋪鋪書一名健役三名號旗號燈上承下接往來馳遞以通文報維時

上天垂佑

皇帝洪

福自十月初八日後連日大雨如注山水陡發道路不通所有李奇天王定珍胡儀書糾合各逆黨不能如期畢至豎旗之際僅得四百餘人帥旗又被風折各賊先已心寒欲為擇會期而事已漏洩勉強起兵十三日廖幹周統賊數百白布纏頭口吹海螺攻劫新坊村勢甚猖獗監生廖

皆堂等率領鄉勇悉力接戰殺賊一十二人奪獲賊旗賊退去同日賊攻豐山陣于沙洲之上鄉勇接仗殺賊劉俄子楊土地許長生等監生許朝陽等生擒劉思茂奪獲唐天子靈山大會旗二面搜出順天王合同賊張啟祥吳興廷圍聚柳家庄陳錫如陳祥珍圍聚嶺下排鄉民黃玉傳禦抵之殺賊周勉堂溫隆保賴運廷鄧傳先又不知名閩匪數人捉獲楊興萬一名生員溫廷揚等守住曾坊選捉獲王定珍等二賊黃沙村監生陳煜等獲賊黃會連等廖姓族長廖天儀廖皆堂等帶領鄉勇乘夜潛往攻打田江村賊巢賊出拒敵各田兵奮勇接仗殺死廖幹周之弟廖

昆元同不知名賊三人賊弟廖永恩廖方周及方周之子並賊母均自縊投水死捉獲賊父廖象明立將房屋焚毀
端平賊由富溪村謝地坳茶壺坳曹籠村等處經過守隘
田兵獲賊寧都王沙朱得老男賊陣于猫尾嶺高豎帥旗
耆民陳洪波等攻走之獲一賊守長樂村耆民陳煌先小
弼生員賴光裕等獲賊孔友朋搜獲賊許彩堂又獲偽將
軍李曉園黃鳴耀傷斃賊陳幅崇廖矮姑十四日賊陣于
石古嶺帥旗冲先飛放火毬火箭喊殺連天桐江紳士許
瓊等率領鄉勇奮力接戰殺死賊許良子許觀音等七人
奪獲賊帥字旗下漿村拔貢劉正育等率勇守禦賊劉勝

田等拒捕接仗鄉勇劉翠東等殺賊劉百寶劉進寶劉倍
子劉裡村劉夫生及劉勝田之妻鄧氏丹溪監生李益夫
等殺賊廖達祖李佐風李寒子許佛生王有進李迎南並
不知名賊匪捉獲李奇天及妻王氏子李女春王兆文李
利波李友宗李念茲李得明李細女李梯書李炳西監生
黃元燻等于鷓鴣村聯合鄉勇向井坑村捉獲吳紅士之
母吳黃氏搜獲金龍紅小旗下明鄉賴翠貞等殲斃白坑
賊匪巫德貴馬步海擒獲甯遠容江德林十六日復戰捉
獲賊李朝英江玉書江必祥奪獲黃龍旗織龍單票其時
廖幹周已被廣昌駙前堡紳士賴嘉猷等同石邑鄉勇夾

攻殺斃斬其首重一十八斤官兵亦四路雲集 撫憲秦
臬憲衡 道憲蔣 贛州鎮憲花各帶員弁先後馳至雖
正匪已斃或被擒拏而遺孽未靖謠言未息人心未定奉
臬憲委員帶同兵勇搜山先後數日間大猷坪練約曾賡
揚戴友蘭獲賊李朝光監生徐希勅同牛屎陂沙墩村二
處鄉勇在杉柏鋪獲賊陳順廷等上坑村監生周世榮等
殺斃賊匪周受天龍上里練約獲賊阮亮廷周德亮張雲
崇秋溪增生賴炳文等獲賊賴在岐小坑耆民余永滿等
獲賊溫書廷陳坊村生員陳一風等于坪山獲賊陳七子
宋斗光何祥遠民人何雅久等捉獲沿沙裡賊楊興方東

坑村練約汪錫蘭同鄉勇等殺賊張萬子等大牛嶺武生
謝廷揚獲賊謝承苟謝捷元謝和書及謝廷格之妻溫氏
堂下村職員溫應泰等獲賊溫暢宗馬腦石鄉勇黃緝繩
等獲賊徐幅祥上广村民人李鎮邦等獲賊李方樂松山
背民李信元等獲賊張書珍張廷才生員黃述堂等拏獲
松城賊許五子下路鄉勇獲賊熊秤勾均一一按名送縣
多有擒網至城已因傷斃者有自知難逃法網自縊溺水
者諸鄉勇盡力搜捕月餘匪徒約畧淨盡 大憲親提各
犯逐一研鞫務使無枉 臬憲衡焚香告
反書議擬入奏分別凌遲斬決發遣各若干各大逆緣坐

各若干名首級纍纍竿視蒙街備載後奏摺中不復冗叙
事後論功奏奉

諭旨

一等廖皆堂許朝陽二人賞給縣丞銜歸部即選二等溫
仁夫賞給訓導職銜李益蕃李勝波李益夫溫受民賞給
八品職銜三等李藻等三十四人賞給才尉干城匾額劉
正育等二百三十一人賞建義以為尚坊四等賞給銀兩
知縣李大謨加知州銜各憲辦案竣各自公回衆紳耆請
留弁兵彈壓地方 大憲許之于是招集流亡撫卹難民
漸令鄉勇解嚴禁止毋許挾仇妄指許告報復諸弊分頭
宣講

聖諭廣

訓務使家喻戶曉由是萬姓歡呼共慶大平士農商旅安
居樂業是歲底旋撤添設窩舖明年三月下旬稟奉 憲
檄盡撤戍兵歸伍石城平夫廖幹周以一鄉曲無賴游民
膽敢于化日光天之下逞其魑魅魍魎之技妖言倡亂引
誘無知愚民聚至二千數百人之多混加王號龍旗龍票
偽封官職公然攻劫村庄實屬罪大惡極惟我

仁宗處

皇帝

聖德如

天

蒼蒼默

佑始則雨阻其黨羽繼乃風折其帥旗已足褫賊之魄碎
賊之胆加以官民用命守禦剿捕人人奮勇無不一以當

百此蓋石邑士民皆知祖父以來受

國家深仁厚澤決髓淪肌共矢大義一聞亂賊無不痛心切齒競欲寢皮食肉忿恨如報私仇故不三日而賊皆授首雖烏合蟻賊釜底游魂原不足論然不意撲滅若是之神速也或曰么麼小醜偶爾跳梁立為灰燼何足以紀此非知者之言也夫前事者後事之師涓涓不塞將成江河設使當日李公聞警畏葸不克即至城鄉紳士各顧自己身家不輸錢穀不及團練鄉勇又或守禦不固接戰不力勢必敗潰次裂蔓延難圖迨夫賊勢既成而後徐議剿捕調兵若干費帑若干迨禍削平固已焦頭爛額矣乃李公倉

卒遇變奮不顧身冒險迢回保全萬衆厥功甚偉而在事諸君子散家財督團練親冒鋒鏑與賊搏戰為

國宣力為地方禦災捍患其智勇為何如哉其勲勞又曷可少哉李侯另有傳

五言古詩

明

衙齋夜月對仙姑嶺

邑令 吳正誼

孤峯倚窗前
蔥蒨如解語
微雨晚來過
月白還高舉
邑小
有餘閒
逍遙步庭序
呼童吸澗流
新茗聊自煮
俯觀羣芳
陰符藻亂清
渚仰瞻樹間禽
大小各有侶
因念部屋下
能無失所處
清輝本娛人
忽此攬予緒
願回綺席光
窮簷照
機杼

下五龍巖

夙昔懷名山
幸作山中長
緬聞雙巖奇
撥冗一探賞
逶迤

郭南門緣岡脚直上夾嶺攢長松松聲多清响扳躋更窮
窈漸入忽宏敞呀然絕壁開卓立巨靈掌東西落珠泉噴
沫幾千丈碧潭下清澄微風時澗養紫芝雜蘭茗浴日金
光蕩幽禽翮忘機狎客隨偃仰跣趺坐其中忘却世間想
丹砂如可煉勾令我同往

國朝

石城城工縣誌報竣誌喜

贛州太守汪宏禧錢塘進士

雙江匯虔州崆峒排遠勢形勝數東南領縣一十二用命
須同心導揚

聖人

意天時乘曦和動想民物利年豐慶春秋廉惠始無愧墜

舉廢復興乃不慚素位近邑如石城往古稱善地土俗上
皇風人代遞相洎英賢皆士夫山川信圖記立稼遵先農
勤作能奉義里巷少浮游業擅百工備方今乙丑冬犀力
成盛事周城喜重新雄堞除辟荔郭門亦改觀金碧書大
字平壑接層巖映列發彩翠草木合清暉日夕雲霞媚氣
象瞻高軒炳煥耀萬類深邗聞吹獨曠野多滯穗飛走食
所餘即此先應瑞流水鳴琴聲採撫情循吏細碎及重魚
一一誠可誌吾儕敢自閒隨在堪舉示缺漏宜補遺綜分
盡牽綴卷頁該而詳點筆共見志世候歡若今誰謂與昔
異賢者能至賢緩要有番次行謠期相聞操刀徵小試拭

目擬王君琴江見臥治為言來歲春花柳栽定易詩呼携
壺觴應陪醉翁醉

留別邑中紳士

公署邑篆一載清操
多惠政邑人德之凌西峯河南

夙昔慕賢聖榮名若不早學割試操刀曰余未聞道楚卿
斤白珩惟善以為寶名宿多耆舊緬彼高山老版竒貌亦
古鄉賢足師表同輩三五人逸致思高邈總角童子嚆藝
苑試文藻成人皆有德小子復有造蘭蕙為氣味詩書愜
懷抱非公不我至勞我履空倒旦暮時相訪杜門而却掃
清池日瑩瑩明月常皎皎不惜斯須別惟願敦素好

遊海藏寺

長沙府
知州黃之柱邑人

郊坰富邱壑名勝萃西里我從五龍巖清晨恣步履嵐氣
濕衣裳僻徑緣山趾深谷忽聞鐘嶺從人面時登涉步愈
艱磴石疊相累維時三月間鳴鳥撩人耳露珠時一墜虬
蓋交相倚愈入徑愈幽盤折多花蕊但見白雲封不見谷
之底徑盡巖确間海藏觀尺咫入寺僧逢迎引入曲房裏
暮爾水潺潺十笏列席几開窻綠影浮瀑斷橫雲起石壁
字隱現練白穿簾紫濺珠注深潭人影入潭水幾點鷺鷥
奉白鷗咏香芷頑坐頑忘機曠然消塵鄙願得安閒身請
書水之涘

冬日上龍頭灘

川路石齒齒兩岸山峻截松樹猶繁陰煙翠光明滅水落
灘高愈激濤噴飛雪轟轟似崩雷一曲一傾跌舟子苦挽
牽力疲聲亦咽船仰浪若梯頭尾高低別風威冬氣深心
喘益冽冽灘下飽午餐灘上見月缺

遊滴水巖

洞口牽蘿蔓洞中疊石子出洞豁然開奇石間異蕊綠竹
含歲蕤苔錢引步履步近聞水聲巖開半壁裏香厨與僧
房深淺緣巖止白虹挂壁間珠濺巖頭水水碧映金沙源
清流不滓涓涓照人明靜觀悟妙理坐久夕陽斜翠合瞑
煙起

詠龍岡石硯

龍溪清且漣溪底孕奇石含蓄歲月深蛟龍所窟宅春漲
漾桃花漲後竒姿出琢磨假良工粹質凝蕉白故人持贈
我幽室光奕奕悠悠一片心視此徑尺璧瑜珉比溫潤噓
呵愈澤澤數載樂閒身門無車馬迹竹跡梅影瘦松蓋覆
深碧終日數巡簷相孚共晨夕而喜几案間石交更不數
重九前一日雨後山行

釋興沛

石城山多童有石無樹木海藏僅有松又苦多樵牧大者
漸皮剝高枝亦顛撲小者力尚微豈易言長育雨後偶山
行山菓皆新熟隨意各扳取一一可拄腹吾生僅如此聊

石城縣志 卷八
以代饋粥學道雖無成且免世側目每看峯頭石高棹干
山禿秋風不可摧秋月時往復夜半生雲雨似有神龍宿
九日當登高乘此過天竺

新增

題五龍巖

失名

昔人題詩處舉首見巨擘浩歌撼潛鱗遺刻倚絕壁至今
墨池水飛流濺滋液一洗冰雪曾頓失書傳癖境勝難為
言珠玉况在側為語五髯君寰區仰膏澤

右詩原鐫巖上石壁大有唐人風味舊志搜羅未及
今從苔蘚剝落中摹出補入惜不知為何人所題也

七言古詩

明

苦旱行

漳州熊懋官邑舉

維石砥此蠢且愚唯知作苦業耘鉏奚堪熯氣漫空起正
當五六金伏初銀河方收曉霞續火雲萬疊隨金烏雷鞭
不鳴電熾捲雨脚欲墜看還無蘊隆蟲蟲似薰灼煮石欲
爛江欲枯崇堂石室如甑坐遂令大塊一洪爐田疇龜裂
潤盈尺青草盡變為萋苴乾稿祇堪供野火過楚一炬無
遺株踏車未停水已竭巨沼剛有一尺滂以沫相濡濕相
吻誰道田殃及池魚漢陰丈人空抱甕塘陂雨涸奈爾乎

手皴足腫面如土始信至苦唯農夫富人徵輸徒拍掌貧者束手填溝渠呻吟嗟吁徧四野坐聽不覺淚如珠茅山留狗竟虛幻謾向舞雩勤匍匐石湫有龍能作雨乘雲東去不受呼或思為韓訟風伯或欲積薪焚魯巫獨訝賢侯動拜禱盂中止飯盤止蔬日下稽顙聯耆英首不張蓋乘無駒銀河之水故不涸曾記高巖雨如酥安得侯心動彼蒼借得天瓢如建壺濡焦植仆須臾間且免餓殍盈衢途當時有士病起初大叫直欲排帝樞只聞到處金鼓喧不見甘澍隨金輿君不見東海孝婦冤大旱三年民無哺又不見鵲夷浮吳江姑蘇止拾贏與蒲天人應響若桴鼓此邑之旱當誰辜吁嗟旱魃遍寰區比郡盡是斯人徒愿將數百陳乾州霖雨天下蒼生蘇

國朝

送石城李侯還郡

李勗承寧都人

昔載烽烟處處浮今見鴻飛集荻洲年來年去無多日鴻集鴻飛竟不侔記室可容生入幕銘勲燕然為君作策勳清廟是何期百里孤城惟君托汀府偽軍意氣豪佩刀光閃曙星高畫旂鉦鼓淒風度火旅雲騎填陌路眇眇彈丸何足推氣吞城砦山陵仆使君矢志能不回感激多生杆難才荷並揮鋤不識伍橫戈取敵報父母毆殺豺狼千百

石城縣志 卷一
犀郊圻赤子獲安堵赤子愛慕倚君傍君為噢咻不忍傷
繼緒君兮悼君去琴江最是淒涼處

龍頭灘

龍南鄧 霽 萍鄉 訓導人

連山怪石橫江溪錯愕中流森齒齒浪花彌望噴江豚洶
湧狂奔迅如駛峽束砰錮地軸推聲若轟雷凡數里併力
齊聲邪許呼兩岸挽牽人櫛比遲遲脫險慶安瀾利涉持
危蓋有以君不見浩蕩長江萬里平艤舳檣櫂常推傾水
能載舟亦能覆險豈盡闌灘石橫

海藏寺琴水奇觀處觀魚

德安陳 侗 邑拔 教諭

石壁掛流禪室側注處一開丈尺澤停蓄小魚盈百千不
過三兩寸而極年年玩之亦如斯豈謂清機趣自得間或
一隊水面浮掉尾躍浪不嫌窄道循石罅蕩漾存不上不
下偶乖闕湧起荷池一坦平水滿晴光混通塞貪不出渠
餌不粘回歸石下安常宅間間散散無禍幾縱瀑轟時如
過客

琴江八景

張國衡 南城 增生

混沌會開七日鑿在天星辰地河岳大塊網縕結撰奇造
物因之成柱脚琴江山水煞清幽八景參差環城郭天然
兩華嶺西東中有貴人拳約綽嶺岼傑出拱青霄播笏垂
紳朝碧落慈龍秀色寶鍾靈信有人傑相繼作石笋何年

豎山麓亭亭獨立空寄託
嶺前峭嶒插霄漢神工鬼斧費
追琢五丁移來一砥柱撐破蒼冥露頭角一水盈盈繞孤
城彼岸浮圖相對卓銀河倒景入中流遠映江心塔儼若
微波搖漾層層影出没魚龍時駭愕彷彿扶桑鎮碧津還
疑鮫室蜃樓難測度泠泠清韻響琴泉流水高山不寂寞
石為素軫水為絃一弄再弄游魚躍成連先生移我情瀕
洞杳冥堪摸捺峭崿蒼蒼一烏嶂老樹排雲陰漠漠爽籟
瑟瑟是松風宜有仙人高架閣忽聞天香嶺外飄金粟成
堆光的爍夢裏小山何處是此中好赴淮南約樓谷嶙峋
最險巖中產丹砂遍地著應是麻姑擲米成稚川煉就偶

遺却瀧湫滾滾瀉龍巖大珠小珠時噴薄晴明不住風雷
吼遙瞻白練如張幕我來琴署經五載居停惟有琴隨鶴
墻低不闕看山眼日望東華西華之郭郭變幻煙嵐几席
間置身恍矣在邱壑窮年却媿尚禽閣名勝未能盡領畧

Blank columns for text on the right page.

五言律詩

明

龍門書院讀書亭

邑令 黃廷鳳

近來尋隙地卜築讀書亭公事頻呼馬閒情且映螢本期
高士傳強擬使君星興比王猷迥琅玕檻外青

西華山

貴州 經歷 黃 相生 邑貢

半生渾是夢脉脉寄喬松屐折忘林密行危醒遠峯雨餘
深竹鳳天接石泉龍煙篆空盤結黃花自合濃

通天巖

黃嘉謨 邑紳

林蔚秋陰遍巖虛旭影含幽通斷石徑靜息夾厓庵雙袖

國朝

携晴翠羣峰落晚藍
靈明窺徹處山竅作禪參

再遊興善堂

黃 韶 邑廩生

寂寞何所始重來
靜裡尋靈暉不在樹
榮落已成林
圓覺分塵想雲英化水
心此中無限意反悔
讀書深

金口寺即事

邑令 郭堯京

古刹何年刹朱樓
付叔仄茅簷勞衲子
法象起莓苔願引
清涼水長驅甲盾埃
不妨庸吏俗日涉
盡瓶粟

遊西華山

賴 璠 邑庠生

直躡蓮花頂憑虛眺
大方風煙低塔影
樓閣枕江光僧院

殘鐘梵仙衣裊篆香
丹書如可覓從此訪
華陽

上五龍巖觀瀑

獲鹿知縣 溫朝縉 邑舉人

飛虬卷潭下雨過氣
逾加山霽奔雷撼壑
風噴雪斜坐分
蝴蝶草杯映杜鵑花
定後忘觀水淙淙未
覺詳

杪秋泛舟登標峯塔
遇異狀小髡

陳王道 邑庠生

風雨過重九山川探
小晴一橈凌浩淼七
級躡空明不醉
萊萸女聊敦薜荔盟
芻尼呈怪現變相想
羣生

早發遙嶺

劉 綏 邑貢

乘曙出門去微寒一
壑深路明星有爛樹
密露成淋脉脉
誰為語殷殷自動心
欲援秋在處煙氣障
平林

登寶山

温健邑歲貢

深秋興不極移杖到層巔帶露松飛雨臨風竹嚮泉苔紋
懸鳥跡雲脚接山煙蕭索空門景何時有俗緣

題寶山寺

鄧銘邑舉人

寶刹經年古虬松罩日昏洞雲爭榻宿山翠貢簷吞謝屐
香黏草陶醪醉問村空遲青瑣過猶向白蓮奔

梧岡壁月

張正述郡廩生

秀夾梧岡迥山空月滿樓初依林葉暗漸遠露華幽清入
梅花影寒生玉笛秋笳聲何處動風冷遍星牛

半壁鷹巖

羣鷹巢半壁飛倦自知還啼暝煙千樹窺人水一灣溪雲
何處起崖石未全頑欲問樵夫徑松聲隔遠山

雲盤烏嶂

劉飛熊金縣舉人

自入雲峯裏人如天上行微茫千嶂迴香靄一山清空谷
無心出高唐儘夢生可堪僧不贈留取自怡情

峯卓香爐

古刹華巔隱香爐曉勢分用杜巖花疑是火石竹自生雲
片片旃檀靜層層貝葉薰真如原不昧煙裊識山焚

城現琵琶

高張城勢出國腹琵琶名臥平川四繞山為撥雙流水作絃

石城縣志
檀槽藏雉堞歌板動雲煙疑有甍賓鐵一片老深泉

丹井水開

陳 倜 再見

山頑泉作活心熱水為寒隙線有潛谷聲沉無怒湍窮根
清徹底向上眼多寬求藥周遮病膏肓是粒丹

佛洞燈深

冤峰參月影螺髻起堆青下有天鏡室中餘花雨零一燈
傳選佛六字隱含冷不昧彌陀意酣眠夢亦醒

遊西華山

溫必聯 邑進士

絕頂樵無路寒崖洞有風人成猿鶴侶寺倚斗牛宮詩閣
孤鐘韻禪心一鏡空幽竒探未極愁起暮雲中

題石城縣志畫景圖

黃 琰 錢塘監生

虔州郡齋客偶見石城圖城郭此時好溪山他處無想來
犀念合心往活雲扶石筍際天漢一聲回雁孤
圖經及縣乘點筆訪雲山倦覺遠千里身宜卧石閣吟情
與霞會茗興在松間忽為琴江約浮查使往還

寄題黃海客饑樓

忍饑聲起處想見坐谿樓飲道堪充飽青山欲白頭寒知
松雪曉事往水雲流即此尋真趣休為萬古愁

城現琵琶

黃 炎 邑人

欲擬方城象絃靴正好看河流銀作線塔影指如彈有月

石城縣志 卷八
仙姑抱無聲石耳寒會當逢子羽高韻奏飛湍

西華絕頂雲

熊 銓 邑庠

白雲何所有冉冉峯頭生肯與嵐光合轉教山色明衣惹
僧不俗羽過鶴還輕獨喜為霖意年年占樂耕

中秋夜城上望仙姑月

一片秋山淨城頭月正臨珠光橫兩岫水彩結層林消息
頻年到盈虛此夜尋如何仙子杳空對桂華吟

和邑侯劉緘齋春雨初霽遊海藏寺韻

熊元善 邑庠

飼鶴調琴暇尋春向澗阿風從花裏出人似畫中過減從

雲為隊驅車袂染蘿迨陪遊屐慣清興讓公多

海藏寺

黃之佐 邑歲

僻寺山迷隱泉從石罅來鉢魚吞半漱分蘋撥微灰野淨
雲為鎖窻虛石點苔春寒僧夢穩剝角急濤催

淨土巖

徑深蹊谷合淨土雨巖開樹老飛紅葉池寒洗綠苔烹茶
僧髮白話古版圖仄不盡尋幽概松風帶雨回

遊琉璃山

溫鵬達 邑拔

地迥塵難到危岡翠浪成仙風青鳥去山果白猿爭昔劉仙姑
得異果啖之化形而去山因此易名石鏡空搖漢雲鬟半入城歸途夕照裡

石城縣志 卷八

回首尚分明

景雲寺 即五龍巖庵 去巖里許

溫貴樞 邑歲貢

寺古雲為覆松盤鶴可巢小樓避玉湧曲澗雜金敲不事尋僧偈還須讀易文夜來風雨集咫尺起潛蛟

海藏寺

溫成珪 邑庠生

曲曲尋幽剎行行赴澗邊林高新月碍壁古小流穿

石壁有飛

瀑鷄琴水 奇觀四字 隨意觀魚躍裁雲歌石眠矯龍真可宅風雨起飛湍

新增

鴻石十景錄二

潘國逢 邑舉人

芝憲雲海

極目荒荒白當牕淡淡鋪千山一洗盡幻作海雲圖日曉江天迥庭空野鶴孤浮槎誰可共此際一高呼

仙巖米積

好學南宮老深深拜此巖無禾曾萬粒有口已三緘尚憶雲根墮空憐石室函胡麻那得飯飢債可誰饒

天公雨復雨大庇天下皆豐年

拜經巖

溫寧邑舉人

一水拖藍繞上方三山如笏禮空王樹為幢映溪窻瀨風
挾鐘飛竹塢霜貝葉名巖遊客幾鏡花留偈悟誰當間同
諸衲譚諸品洵有青蓮出舌香

通天巖

邑令唐繼顏

翠微丹壁半空蒙巧鑿靈霄一竇通疎影浪圓刀鏡月晴
光長貫玉瑤虹登高作賦慚今拙題句磨崖自昔工踏遍
薜蘿香屐齒冷然疑是御虛風

下五龍巖一首

邑令黃廷鳳

兩年雨暝尋秋寺一路忻從遠岫行古澗龍啣珠錯落禪
關虎護石縱橫僧依蘿屋憑虛住松挾濤聲夾道迎英歎
塵纓無處濯巖前新水照人清

其二

淑浦霜高菊吐花為尋秋色到僧家傍巖掃石衝飛葉立
鳥看雲過斷涯野外自能寬禮數山中誰與說桑麻五龍
留客送巡醉歸路前汀滿月華

與府賓筵

浙江武義知縣陳師仲邑選貢

解印歸來十五秋巖花林鳥若為傳清風快意琴三弄明
月娛懷酒數甌忘我不知天地老向人羞論利名浮黃堂

石城縣志 卷八
謬有賓筵召執爵深慚未白頭

仙姑嶺

熊懋官 再見

波濯寒輝素影生幽人乘霧每孤征
叫雲橫玉依屏曉碎露明珠帶漏盈
搗就元霜春草膩飛來環佩晚風輕
漫憐秦女虛殘照留得蕭郎再鳳鳴

太極觀

坐隱幽篁蹟已深滿壺春色任浮沉
橋中忽聽黃冠語嶺上空傳白鶴吟
筆草雲涵當日綠露臺月掛昔年陰
雙鳧天外無消息一着殘棋冷故岑

觀前潭塔影

締造何曾假鬼工巍然七竇現虛空
簷樞先掛諸天月鈴鐸齊鳴大地風
直並金幢標梵界何知玉柱峙波宮
夜來倒影燈千點恍燦蓮花一水紅

友人有中秋同遊五龍通天諸勝之約延至九日方

踐紀之

陽江知縣 陳即登 邑貢生

登高緣已轉佳山猶憾期偏赴月慳
猿鶴縱教能待久向禽應笑共遊艱
重過素節驚秋老莫負清樽起日間
勝具勝游居占斷拚迨杖履乞靈還

淨土巖

浙江經歷 劉有能 邑貢

步入溪橋滿選杉一團蒼玉盡彫劖
懸空欲墜長房石駕

石城縣志 卷八
海如移大士巖摩竭風銷苔蘚字看泉雪點芙蓉衫他年
倘有棲真分只理雲畦種菜鏡

杪冬趨郡還石城舟中有作

邑令何承光

任是疎狂不自由一官八月五度州水中白石寒逾出江
上青山晚更幽相憶故人俱萬里可堪傲吏自孤舟平生
懷抱今何在羞向風塵說壯猷

同社遊西華晚至五龍巖

尹詔邑官

蓮花躡盡憩松根午徑秋峰暑尚煩入夕漸收山翠冷穿
崖忽得瀑花源古潭龍漱珠千點晴漢蟾窺席一痕勝地
遊人難輟集幾臨清泚弄黃昏

東華山晴雪

陳尊德郡廩生

直疑行上畫頭竿一削芙蓉萬仞攢下界蒼茫迷地極中
峯積素搖天寒朝暾不散瓊花色情淡如擎玉露盤咫尺
空明真有路擬驂白鶴入雲端

二月古樟塔玩雪

黃宗臯邑貢生

春深原不與冬侔飛雪凝寒氣更浮平地鋪如白纒布山
巔積似老僧頭吹將松葉添爐響打得梨花趁水流把酒
自然成好景可容高卧閉雙眸

觀前潭塔影

周鴻卿邑庠生

嵯峨百丈自良工影落長江渡遠空碧柱砥流澄隱翠長

竿留影挽飛蓬風來水面搖鈴鐸月取波光現玉應莫訝
合尖難着眼深淵浮動小崆峒

遊五龍巖

唐邦佐蘭溪進士

五龍巖入翠微深龍去巖存容可尋忽聽風生巖上樹猶
疑龍作洞中穿雲石磴還高下繞壑雲雷自古今吟纔得
登臨又言去山靈應笑跡浮沉

國朝

登寶山二首

黃韶再見

竟日披雲得未前遙看松頂又依然飛花不肯隨嶺下歸
鳥偏宜憩石邊一嶽深秋供細雨幾梢殘葉破涼煙携樽

欲盡登臨興芳草猶我閒打眠

其二

倏忽身高入鳥羣半欹半落日將曛山間靜歷惟想響徑
裡相逢盡白雲野碧松陰流不斷谷煙村氣望來分欲知
清爽隨人思鐘磬聲聲細欲聞

春夜長樂寺題壁

草木山中自作奇窮源古寺夜頻吹雲花石月間千瓣香
水人心淡一枝虛响乍聞喧宿鳥寒燈初照靜傳瓷看來
梵放知誰定清影熒熒四壁垂

和蘇郡丞寶福寺避暑

辭喧獨處畏將迎，暫憩精藍夢亦清。
暝色新添雲欲下，桐心初定鳥無驚。
山泉乍冷秋先覺，野寺來寒鐘有聲。
深夜一燈隨靜照，滿池烟雨石苔平。

送郭邑侯陞任祁州

爽氣隨風濕綉韉，征衫猶自帶南烟。
蒲城開後知誰澤，安國飛來却為賢。
載筆披花圖古驛，結裝束水試新泉。
閑中獨對泮無累，依舊雍州帖滿前。

通天巖

邑令郭堯京

誰破巉巖一竇通，碧天如洗見空濛。
苔留古色真疑雨，松韻寒濤匪屬風。
突岫孤峯干氣象，依稀函丈羨神工。
堯高

何限登臨意，又送斜陽月色朦。

朱昭遠司訓以裁例歸安福

陳露 邑貢

尊鄉仕者喜山陴，六百年中得四耆。
夫子自能兼衆子，人師匪直作經師。
難留未必非緣淺，藉慰無勞引數奇。
大約可憑惟骨相，豈長牢落負雄姿。

龍頭灘

何深 連州人

千尋危石峙江臯，水底魚龍出沒高。
峭壁青迴巫峽浪，晴天秋散廣陵濤。
填橋可信瞻烏鵲，駕鶴因知鎮巨鼇。
到眼雲煙供嘯傲，敢云能事屬吾曹。

法林勝境

王諄

澗水溶溶疊疊山樓臺高聳翠微間
啣花白鹿隨雲去入鉢蒼龍帶雨還
垣竹秀添庭樹綠雨花紅點石苔斑
老僧一枕松風夢忘却當年八萬關

鴻石巖

黃新邑貢

却笑年來逐塊忙因尋奇石作商量
巖開洞洞山虛妙泉溜涓涓石乳香
半面白雲秋裏老全身紅樹葉中涼
一回剛好籠烟晚皓月相隨興更狂

七峯庵

撥霧披雲造七峯盤山渡澗一相從
依僧澣俗情原謬禮佛忘愆性自空
雨過瀑飛雙腋白寒流葉落半溪紅
山深

樹老人稀到笑憶從來過此中

品宮朝霧

賴昌言

邑增生

吟研宿霧濕晨鐘靄靄空浮四合濃
谷曙不嫌嵐氣漫林開却為野雲封
小橋人外迷千樹亂葉村中失數峯
可是紅光初到處滿梢銀露滴重重

歸里雜感

林之英

邑人

幽谷盤松樹樹青懸知脂結千年苓
令人歸白社情偏遠說到黃墟淚亦零
獨鹿搖搖終是左征鴻歷歷幾時停
早知江上垂綸好何事煙波逐客星

登西華山

黃元宸

邑歲貢

起步道途爭健遊蕭疎古木引高坵雲橫仙殿連天際烟
鎖禪堂薦地幽絕立不染塵半點閒吟應載酒千甌數聲
長嘯驚秋雁影散寒空豁兩眸

秋日同友登西華山

黃 恕生 邑庠

愛是靈區聳碧空扶筇長嘯幾人同踏雲擬逐青天外看
鳥徧過遠岫中松蓋綠擎秋後雨鑪烟白裊晚來風坐禪
祇為山光好那記西沈夕照紅

遊海藏寺

永寧訓導 溫雲嶠 邑歲貢

寺環流水濯塵纓歷落仙踪達世情寒谷透迤深院徑疎
篁浙瀝舊溪聲牕間翠擁千層黛花下清來百啣鶯默默

山門宵閉後又看新月一池明

巡行石城贈邑令王蘊齋

吉南 賴道朱 陵

冰囊盍亦積金遺清白相傳蓋可思君子由來餐不素大
夫何等度委蛇人堪巨任徧猶未天每諸艱歷試之貧到
難存消息好菜根咬得在斯時

闕石城八景圖書懷

張 德 安慶 廩生

百里溪山見畫圖江心塔影有還無人因好事思徧遠景
愛他鄉興不孤自昔花封成一縣從今仙令下雙鳧通天
巖畔宜閒立擬潑雲霞望四隅

姑峯挂月

劉飛熊 再見

正東仙姑嶺相傳劉瑤英飛昇處也每歲中秋月夾兩峯而出天成清景為琴江第一雅觀

良夜東山皓魄浮壙宮仙致下丹垓峯腰露結菱花架岫口雲棲桂子樓玉兔有霜還自搖青鸞無影幾忘愁年年此會人貪看領取天香一抹秋

姑嶺桂月

陳 佃 三見

嶺亘東橫凹凸開冰輪清夜錯縱迴一年一度秋中爽相次相逢鏡裏媒仙女葉依蟾兔搖菱花影架玉樓隈團光此刻無差謬選勝當呼載月臺

塔影江心

映水浮圖望裏遙刹竿倒豎挺風標疑從洞府支清書直

挂雲巖檣碧霄近鉢未能空處印隔林偏向淡中描波流忽遇風微起一抹神奇不可招

和劉孝廉聖莪遊西華韻

青城知縣 黃軒臣 邑進士

契濶西華咫尺山半生辜負此身閒乍聞長嘯一聲去如共周遭萬壑間眼為峯青青不改心隨雲上上非艱談經若過生公侶定有天花送客還

遊寶山

溫必聯 再見

天雞啼處似蓬壺草際層層級磴紆幾洞風花迷佛屋半樓煙雨捲蝦鬚雲籠老樹千重蓋月印清池一顆珠為報山靈休謝客雙峯頂上興偏孤

題通天巖

天邊盤一白雲富山水幽幽趣自多
鵝眼隱開懸石竇龍鱗細映碧泉波
林垞弄笛流風籟洞底如煙繞砌莎
為恨南歸又北往幾時貰酒上巖阿

賜谷月香山冬日即事

潘國逢邑舉人

刮面涼風動水濱樓頭一笛寄閒身
常因拾句非無得取足看山未始貧
煙景淡時滋意味筆花空處著精神
安排以此堪消日戶外塵紛獨厭人

題滴水巖寺壁

陳維新邑貢生

緣何結宇自紛全曲洞橫開日月懸
一縷篆煙飄古鼎數

行蘿蔓掛新泉坐深細瀑沾衣濕聽久幽禽喚客眠好景最能消夏永一節吟破壑中天

遊吉瑞岩

溫應達邑歲貢生

踏破雲根跨戍樓筆華長倚女牆頭
縱橫古壑窺峯面歷落寒泉咽石喉
為鎖烽煙閱歲月故留薪木老春秋
歸來杖挂斜陽外水水山山一望收

通天巖

溫朝選邑舉人

那日層巖向面謀依稀遙隔半生秋
人驚星斗禪房近我煙雲想竹院幽
一帶長江流石壁幾村茅舍上仙樓
問天疑是有消息肯讓先臨美盡收

龍巖瀑布

陳益新邑貢

野棠細翠綴巖幽絕壁霏霏走玉虬雲氣倒垂簾影動月
痕低印水晶浮驚人晴雨飛還急出壑潛龍吼未休日暮
更看嵐欲滴清冷一片散寒邱

石筍干霄

黃炎再見

巖分石骨接蒼煙望入西南獨挺然一指書空寒霧破丹
霞垂影斷虹連長憑雨洗浮村外豈任風搖隔水邊脫換
金莖承露去玉根羸得勁摩天

龍巖瀑布

雲護峻嶒怪石漫泉流壁上水珊珊高飛白練千尋雪倒

入清潭百尺瀾春草煙迷巖徑滑秋聲葉落洞門寒犀龍
不識何年化夢逐風雷吼未殘

賠珠巖

賴仕鳳邑廩

劉姑此地成仙去南海尋珠飛錫來日月僧關苔徑蝕雨
花元圃石床開倒披蘿影遮巖宇橫豎雲根閉梵臺擬欲
餐從芝甲老靈莖覓遍倚崔巍

燈籠砦

考授從九賴仕優

石壘天懸四削周境因奇險得孤幽誰從烏道盤空上祇
剩蠶叢傍漢浮谷底花寒欺六月巖前雲滿掃三秋幾回
戰火揚塵礫山色而今老碧流

琴泉雅奏

陳同威 邑進士

江迴數里弄層湍，幻作絲桐入指難。
幾度響泉名調遠，浦一痕流水譜前灣。
聽來月下魚龍冷，聲到松梢虎豹寒。
誰是結籬憑曲岸，揮絃疊疊賦晴瀾。

除夕呈邑侯王蘊齋

溫輔 邑舉人

煖飛玉管春光透，清沁冰心凍欲開。
遠閣笙歌牽宿醉，隔年桃李訝新培。
庭無長物琴兼鶴，家有貽謀醴共梅。
侯為少司

冠諱國棟長嗣 遙擬

禁

城賡拜夜厭厭湛露沸三台

中秋夜城上望仙姑月

盼到峯頭月又新，四圍山色映城闌。
由來秋魄每懷李靖

有秋光一半盡 此夕銀河尚憶秦仙姑秦 舞袖遙翻姑射

影，砍枝垂老謫仙人。廣寒漫探真消息，肯許而今再結璘。

奔月之仙

塔影江心

數里迢迢故擅奇，神工巧奪影離離。
晶盤倒捧柱千尺，銀漢輕搖玉一枝。
直擬槎浮波上下，不關錫掛印參差。
何年鴈落秋江冷，却喜峯前翠未移。

姑峯桂月

溫成理 邑舉人

何緣一岫獨仙名，八月清秋夜更清。
影到巧分峯左右，魄

浮光占望虧盈是月大小十五夜月由兩峯正自從舞罷鸞
心冷尚愛妝殘鏡裡呈年去年來如有約碧霄長繫古今
情

遊通天巖

溫成位邑舉人

南望靈巖翠欲浮登臨春訂又深林劈開峭壁連雲鎖放
出晴光到眼幽花覆殘碑磨舊句香迎曲徑認新游坐禪
忽聽松風晚輕掃枝枝一竇收

龍巖瀑布

陳同倫邑廩生

驅盡雲雷夏日寒迸流穿樹下巖端長拖匹練欺風細輕
碎明珠瀉月殘潛見有時矜爪距陰晴何意賽飛翰洞門

深處清光透

下有潭如鏡深不可測

便欲登龍即此看

烏嶂松雲

黃之佐再見

徑掃嵐開見翠微松花隱隱拂雲衣無心帶葉橫眉曲有
節牽虹破夕暉春老漫容虬雪卧暖浮只合絮晴飛懶僧
拖得鞋根濕杖插泥苓香滿歸

通天巖

黃明邑歲貢

巖說通天第幾天巖頭雲覆綠芊芊天開一線何心劈巖
透千尋著眼懸不必捫蘿窺月小擬將觸手弄珠圓數聲
鐘響來天外翰與巖僧伴石眠

遊高南峯

陳錦龍邑庠生

當年古寺石烹茶香沁人心味轉加印屐苔痕鋪徑曲噴
雲泉脉到山賒空餘修竹篩新月獨有長松喚暮鴉一望
迷離春色早隔林煙鎖盡誰家

遊巖前嶺龍潭

張國彩 邑人

先族子字古三於潭內化龍日遠果本母及弟
母陳氏現莖潭崖又傳有符籙過早禱雨多驗

春雲冉冉罩靈潭踏遍磷岫怪石參素練乍飛千點雪綠
梢新織幾層嵐潛來歲月幾經百脫去胚胎本古三珠粒
半筐今在否幸留仙籙沛霖甘

貴巒拱翠

邑令孫緒煌 安陸進士

峭刻孤峯列翠屏

宮牆遙對秀亭亭當離自著文明象

拱北還端侍從形一株山嵐歸泮沼千秋佳氣入樞星佇
看簪笏聯翩集人傑由來羨地靈

石筍干霄

一壁嶙峋天可通旁抽石筍妙神工巖端常欲穿雲葉峯
杪時疑挂月房勢倚危樓撐玉柱影橫幽澗吸長虹若教
飛向湖湘去拜到襄陽大米公

姑峯桂月

閨道琴陽八月中兩峯捧月望城東明珠出積將毋似寶
鏡嵌奩大約同笑我無緣偏值雨倩誰有術一乘風仙娥
飛去青鸞杳剩却蟾光照碧空

烏嶂松雲

西華峯高作縣屏松圍蒼翠望雲停老龍嘘氣鱗餘碧怒
馬奔風鬣帶青似絮不堪補破衲為霖却待滴殘餅梵王
宮寄冥濛裡暮鼓晨鐘走急霆

琴泉雅奏

非絲非竹叶宮商水滴淙淙寄意長夜月浸林聲斷續曉
風拂草韻幽揚波間自有游魚聽岸際頻教駭鳥翔石上
流泉成絕響會心如對蔡中郎

樓蓋丹砂

古嶂相傳弭丈夫仙家寄蹟便仙都當年護洞雲皆紫此

日留巖桃李朱斑駁苔痕封石牖綿芊草色沒丹壚九天
似絕飛昇侶月照雷峯空畫圖

龍巖瀑布

寺側紆迴曲徑盤五龍嘯處水成湍行來巖畔晴如雨望
到波心暑亦寒萬顆明珠跳石罅一條白練挂雲端流聲
常挾風雷響聞道潭多怪物蟠

塔影潭心

一塔臨江矗碧霄婆婆古意認前朝建從寺側非無說影
落潭心孰與招頂笑不妨斜照繪執顏豈惧水波搖南唐
人物今何在斷碣空將姓字標

遊鴻石四章 錄三

鴻石嵯峨踞水涯幾回遼望眼迷離何緣得結三春侶於
此同採一日奇徑側松花行處賞空中樓閣到方知居人
競說多名勝指點山形肖伏獅

春光半自雨中過此日登臨豁眼波繡結平塍青萬疊翠
閒遙嶂黛千螺飛禽影共人形小炊爨烟浮嵐氣多搔首
不知天近遠興來時欲發狂歌

小憩何妨一扣禪偶思茗戰試烹泉書聲交起師多聚經
案長封僧未還芝岫雲光流似水梧岡柳色碧於煙若教
拔宅飛昇去黃犬丹雞亦可仙

遊通天巖 次唐邑令韻

黃開泰 邑庠生

石峭陰移翠欲蒙玲瓏一竇幾時通丹霄日透懸金鏡雪
乳泉飛沁玉虹行到靈區天地別想經月斧鬼神工捫蘿
躡蹬穿雲出花雨香分兩袖風

遊淨土巖

窮幽不憚履巉巖慧劍靈犀一啟緘花弄香腮迎臘屐柳
彈綠汁漬春衫留雲石洞松風細浴日溪泉玉鏡摻徑鎖
烟蘿谿壑遠行來頓覺異塵凡

遊淨土巖

溫孝經 邑貢生

峻嶒絕壁欲摩肩擺却塵寰別一天殘寺數間金佛古危

樓半面石巖懸雖無琅菜和雲種不少龍團帶霧煎瀑布
聲聞心鏡徹老僧微笑坐青蓮

新增

題五龍巖

一枝綠玉兩青鞋來踏巖前太古苔龍蟄陰崖生香藹瀑
懸晴晝吼狂雷長留天上星精次不著人間俗土埃回首
故墟搖紫氣定知神物夜能來

右詩亦原鐫巖上石壁不知何人所題

五言絕句

國朝

東華

溫富訓
邑廩生

縹渺參天迥晴看翠欲浮遙疑扶海近捧日上峯頭

西華

烏石何年劈原名烏石嶂屏開衆岫依松風吹梵響帶月下城

西

仙姑嶺

一片秦時月嶺有女仙劉瑤英秦末人光分鶴影返嶺雲秋不掃何處

認仙家

海藏寺

南嶽僧何往

興沛為南嶽僧

山深磬獨鳴奇觀一片石石壁錫琴

通天巖

勝地恣遊後靈巖一罅通誰將天影束瀉入壁蘿中

洪石砦

壁峭天成壘林開月到峯太平無戍火歌詠足三冬岩頂多書

屋

新增

城現琵琶

潘國逢邑舉人

琵琶千載存撥撥聲不惡彈丸當玉盤大珠小珠落

仙嶺桂月

秋月如鏡圓正挂雲峯缺不復照仙娥空多此皎潔

仙奕留踪

何年已飛仙斷碑屹三尺至今竹樹間碁子聲聞得

玉笋干霄

石骨起峻嶒此之謂無黨天風徐徐來飛鳥不得上

琴泉雅奏

此際響清泉疾徐在澗道豈必無子期而故成絕調

七言絕句

宋

龍泉砥柱

福村一八景之一

劉復初進士

汪汪長繞碧雲端
撒散靈珠六月寒
一石中流渾不動
直扶神物駕風搏

明

題竹贈石城主簿倪仲威

陳謨泰和人

越王臺下送飛艎
折贈琅玕百尺長
歸到石城官舍冷
月明四壁動龍光

上五龍巖澗內網得朱鯀

熊連邑廩

錦鱗成族此為稀
質性堪分火井輝
莫是蛟宮增史秩
波臣亦自有朱衣

碑山

溫國賢邑人

三年不見此山頭
為父白冤獄三載始寧家
幾許星霜兩鬢秋
喜得日華初出頂
踈踈林木映寒流

國朝

愴廢邑

邑令董應譽

荒荒何地足登尋
極目徒傷望古心
刺有戰場成赤壁
難將瓦礫變黃金

署廢

豈是花封草更肥
紛紛牧馬盡忘機
焚琴煮鶴無亭館
片石芭蕉伴紫薇

謁學宮廢址

梧桐伐去鳳安歸
首着欄杆化蝶飛
數仞牆高空際影
斷池衰柳獨依依

瘞白骨

不向鴛鴦塚上栽
骷髏化碧未心灰
只拚抔土輕持贈
曾集啼魂暮雨來

僧兵輪次守防

跏趺抱月守嚴更
竹柝聲高夜氣清
未必頭陀渾是膽
十

年棒喝也知兵

其二

霜圍百衲鼓三更月嶠光寒四塞清
將鎖鑰付僧兵

捧檄踏荒

踏荒荒徑綠埋車譜出人間百草書
兵燹數年泉殖耗生憎野蔓不曾除

入鄉勸輸里氓告饑適聞隣警

十畝山畦九輟耕量沙可得療蒼生
血痕半赤溪流數武村前即整營

登西華峯眺石城琵琶形

日日披蓐潰堵中升高纔見石玲瓏
琴江一曲琵琶舊我欲新彈爨下桐

夜宿山庄

山中劇暑夜如秋竹屋連塘雨况幽
蛙部公私渾不管詩腸一縷夢餘搜

山中月

偶來信宿結山因四面皆山我一人
夜戶不扃無犬吠月明高樹自為隣

通天巖即事書懷 其四

邑令 郭堯京

谷前為巖，嶺橫廣十丈許，無草木而獨隱有數
尺一級之形，石紋鋪裂如砌，抵嶺上直下峭壁岸
然有振衣
千仞之勢

巨靈劈破洞天光，振袂欽塔逸興揚。
大壑風生來絕嶽，數聲歸鳥又斜陽。

登樓口占

一線江流檻外浮，揮絃撥盡古今愁。
可憐一片荒榛地，倩得明霞入望樓。

望仙姑嶺

人民城郭未全非，依舊枝頭好鳥歸。
鈴閣初營新月上，開簾繡嶺吊仙妃。

漫興

寒暑苔封滿地錢，長天危坐賽枯禪。
閒中賸得登樓興，坐到漁舟唱晚天。

其二

當軒霽色碧浮波，雙塔干霄影欲那。
落日樵蘇驅犢下，夕嵐一抹遠林過。

夕照

借來煙景向人誇，闌外衆峯碧一涯。
返照江光明遠岫，青螺嶺上散紅霞。

獅石仙書

福村八景之一

劉綏再見

怪石嘶風占碧巔丹崖蚪蚪尚瑩然泰山有石摩秦篆不
及仙峯字可傳

龍泉砥柱

福村八景之一

劉寅

解邑人

昔年有客探蛟門風雨紛披逐電奔每向波平觀勝蹟孤
擎一柱浪中存

輓災童

徐

滾

錢塘人

藝圃翱翔冀顯揚詎知才命兩相妨同人休怨泉臺寂祇
算修文在異鄉

其二

無端玉樹竟長埋千古名場半屬階他日孤魂追及第方

千羅隱是同儕

龍巖瀑布

黃

明再見

晴雷百道吼巖巔不捲珠簾雨脚懸龍去龍來今又古空
留斷壁老飛涎

中華民國廿四年七月七日 收到

鈔

2811

